

Basef Ifimba Pol Nanda'ef Fagafe'ma Esis Romi

Basef bandafi Pol nanda'ef fagafe'ma esis Romi

- 1:1-17 Basef fagali'i Pol nanifela Goda esis Rom
sagahapifanai
- 1:18-3:20 Okom wandafunai Godi mapoma
epes hiasi hi'alas, esis Juda saloma esis owa'
Judaisia wapani
- 3:21-4:25 Epes mamahisa sagahapifa Jisas
Kraisi, God nofalas na'i epes isimba be'es
hilili'i
- 5:1-8:39 Apa' epes mamahepama magahapi-
fanai mape opaf atotof maloma God mape
mandagala maga' maloma Kraisi ea' mosafel
wapani malomana mape namepa Ambal
ananinai
- 9:1-11:36 God nihimba'mapa okom ananini
atom nandandepa epes mamahisa anen
okom maga'iasi ea' na'ipapa anif basefa esis
Israel anaf sope si'imama
- 12:1-15:13 Waf apa' Kristeni
- 15:14-16:27 Pol na'i basef akutaifi ea' na'i
basefa dagala ananini wapani nafe'ma esis
Kristen sagape Romi

*Basef kofagefa Pol naga'ipa esis Roma maol
apospel anen nanda'ani*

¹ Ae' Pol ape lafela Krai Jisas anda' maola anen atona. God nofale ma enda' maol aposel ea' nosahe'e ma egawalapa basef bu'wafi ananifi.*

²⁻⁴ Basef ifimba fagape na'amba. Fowa' gani God nala' lapa basef ifimba bu'wafi ea' na'ipa amom profet ananiami mawalipasef manda'ef fail buk Godi. Basef ifimba fa'i Nogamana ananinai, Jisas Krai dembinai ape'inai. Ea' nofa' alop apa' epesi nataga wambota aman dembinai king Deviti. Apa' dei' Ambal bu'unai Godi nawalapana alihina ma banagami Godi, anen Nogamana ananinai endilisi. Ambal anamba nasa'mana nogosafel wandof wapani. * ⁵ Lagof Jisasi atogof God natopalope dowaf nowa' banagae anda' maol aposela asa'ma agol Jisas Kraisi lu'wagol. Anen nanda'as na'amba ma anaf anis amam nematawa misi'ah hiasi hi'ilas sohapifana sogaila basef ananifi. ⁶ Ipa' wapani pape mini'ap apamba. Ipa' pame' fala Jisas Kraisi ea' pailana pape ananipai.*

⁷ Ipa' epes Romipai, God okom maimailipa nofalepa ma pagape amam nematawa ananipai atipa. Ae' anda' basef ifimba fafi'mipai. Ae' a'i God ahamapa ape'inai noloma Dembinai ape'inai Jisas Krai motopalopepa dowaf mowa' banaga opalef ipe'ilifi fepe sa'ombel.*

Pol na'i niti esis Rom

* **1:1:** Ro 16:25-26; Ta 1:2; Mt 22:42; Ro 9:5,15; 2 Ti 2:8; Ap 13:2,33; Ga 1:15 * **1:2-4:** Ap 26:16-18; Ro 15:18; Ga 2:7-9 * **1:6:** Nam 6:25-26; 1 Ko 1:2; 2 Ko 1:1; Ef 1:2 * **1:7:** 1 Te 1:8

⁸ Ae' a'i ata' ili' iga'iesi isimba. Ae' anifela God ae'anai ma agol Jisas Kraisi, anifelona ma ipa' wapani. Dei' main, esis itap ganimba hiagoma sa'i basef ifimba ma ipa' pagahapifana. * ⁹⁻¹⁰ God nogawa nemaf mamahefa andabetenafi okom ae'ami mandanda' ma ipa' anda'mepa beten. Ae' anda' maol Godi aloma okom ae'ami si'ima agawalipasa basef bu'wafi ma Nogamana anani-nai. Beten ae'ani nagape na'amba. Fowa' dondol nimaguf hiafi ahali'ana ma efo'o igatilipa. Owa', owa'atin. Dei' wapani ahali'ana ma anen ni'i awiai, nonda'me ano'w ufiawa efo'o igatilipa.

¹¹ Ae' okom ma'i a'owa' ma atiasi efo'o igatilipa ma ewa' banagaepa egase'epa anis hiahaom fasimi Spirit Ambal Godi nogase'epam dowafi.

¹² Amamba na'amba. Ae' a'i hapif ae'ani netopalopa ipa' ea' ipe'ini netopalopa ae' newa' banagae. Isimba sowa' banaga opalef ape'ilifi na'amba atin.*

¹³ Ae' a'i ipa' alipipai ata' pegawa nimaguf hiafi ae' a'i efe'mago ipa' ea' afi'i ataga dei'. Owa' anis hiahawes sasopama ufiawa ae'. Fowa' atopalopa anis sogololama Godi sataga Kristen salutu banages. Ea' dei' a'i ata' etopalopepa si'i agatopalopa esis. ¹⁴ Ae' wiaf fotaome ma egatopalopa epes hiasi Kraisi. Wiaf afamba na'amba. Kraisi natalowe maol lu'wani dei' ae' egwamanan etopalopa epes isimba hiasi hi'ilas. Ma sogogawa waf bu'wafi dambaifii soloma isimba sogololama waf dambaifii, epes gawaisi soloma isimba owa' gawaisia wapani. ¹⁵ Isimba

* **1:8:** Ef 1:16; Fl 1:8; 1 Te 2:5,10; Ap 19:21; Ro 15:23,32 * **1:12:**
Ap 19:21; Jo 15:16

atis dei' opaf ae'afi fosafel endilisi ma egawalapa basef bu'wafi Godi ma ipa' epes Romipai wapani.*

Basef bu'wami Godi, amamba banagami anan-imi

¹⁶ Ae' ina ombal mahe ambal aola egawalipasa basef bu'wami Godi, owa'atin. Ae' ahapifa basef amamba bu'wami banagewe a'owa'. Dei' main, amamba banagami Godi mofa' epes mamahisa sagahapifanai sogotanimai. Esis Juda sahapifi sali' ipa' hipai owa' Judaipaia pagi'.

* ¹⁷ Dei' main, basef amamba bu'wami Godi mihimba'mepa waf usi'ifi ananifi. Afamba na'amba. I'i apa' mohapifa Jisas banagepa atapipa, God ni'i apa' be'epa hilili'i. Ina ano'w ufia'w daia'wa apa' mogataga be'epa hilili' ma nogohnaep ananisi, owa'atin. Hapif atin. Ufia'w si'i Baibel na'ias naga'i, "Epen ami nigahapifa Godi, anen ni'i anin bu'wani hilili'i ea' nepe namin atapin dondol."*

Esis hiasi sowa' alafugaha God

¹⁸ Dei' a' anaf owagama wapani okom numbutinai Godi nifi'i heven notaga nondawalap atapina ma waf hiafi awafi epes sanda'afi hi'ilaf. Anen nogwamasa akafimi awami ma epes isimba hiasi sogowa' alafugaha waf bu'wafi ananifi sanda' waf awafii dei' sagataloga basef endilisifi ananifi. * ¹⁹ Dei' main, waf hiafi Godi ina

* **1:15:** Sam 119:46; Mk 8:38; 1 Ko 1:18-24; Ap 13:46

* **1:16:**

Ro 3:21-22; Hab 2:4 * **1:17:** Ef 5:6; Kl 3:6; 2 Te 2:12

* **1:18:**

Ap 14:15-17; Ap 17:24-28

fandambaho', owa'atin. Waf mamahefa dondo'
 ma gawa epesi God a' nihimba'masaf fataga
 alihif fandawalapa. * 20 Fowa' dambadamba
 God nanda' hiahaom hiami nogota atamba tafi'i
 tataga dei', esis sati hiahaom anen nanda'ami.
 Hiahaom amamba esis ilama sogogawa ma anef
 waf hiafi Godi esis owa' la'ifisa sogatelef naepia.
 Isimba na'amba. Esis satelef endilisi waf Godi
 kofagefa, anen dembinai nikila' amom dembami
 hiami magape itapi hi'alam. Esis sati waf afamba
 faloma banagami lu'wami ananiami magape lifi-
 lafi dondoli. Ea' isimba atis dei' esis ina ano'w
 ufa'wa sondahali' sombaho' waf awafi asasifi
 soga'i, "Ae' owa' egawaea." Owa'atin.*

21 Esis sogawa God nape, apa' esis ina sogawa
 sa'i anen bu'unai endilisi ma sofela agol ananigi-
 ili lu'wagol a'a soganifelona, owa'atin. Ukup
 asasimi mandapoma hiahaom falafalafumi atom
 ea' nelelemb asasimi ina mataga andeande',
 owa'. Mataga akutim awasim a'owa'. * 22 Esis
 aligah maso'as sa'ias sa'i, "Apa' mogogawai,"
 apa' owa' esis sataga ukup mahamahasa waf
 bu'wafi. * 23 Ea' saso'ana alafugah God
 owa' nogaga'ia, ina sanda' lotumana sanifelona,
 owa'atin. Sandomba lawah otamba maim fala-
 fumi atom mataga god baso'amunai mandati si'i
 amiguf, mafis uguf maim maloma epes owa'
 sogape namis atapisia, ea' sanda' lotumam san-
 ifelom.*

* 1:19: Jop 12:7-9; Sam 19:1; Hi 11:3 * 1:20: Ef 4:17-18

* 1:21: Jer 10:14; 1 Ko 1:20 * 1:22: Diu 4:15-19; Sam 106:20

* 1:23: Ap 14:16

Waf naninani aunai

²⁴ Esis sandaiwa'ma God sowa' alafugahana. Isimba atis dei' anen nakwaha esis ea' ukup asasipi pehafel banagambel pahokolas sanda' waf hiafi alugufi. Sanda so'a waolaf saham-bombaga alop asasipi. * ²⁵ Dei' main, esis ukup paso'asa basef Godi endilisifi a sagi'ma basef baso'ami atom maho'ofa basef endilisifi ananifi. Ea' sanda' lotuma hiahaom amamba God nanda'ami, apa' anen, sosambalona. God anen bu'unai kofagonama hiahaom amamba hiami, apa' mondasa'ma agol ananigili lu'wagol lifilafi endilisi.*

²⁶⁻²⁷ Ea' God nakwaha esis saila ukup epesi atipa sanda' waf awafi ambagof awagufafi. Sanda' waf afamba awafi faha'ofa waf daso'amaifi. Nematawa waila waf ikiakafi waloma anowa daiawa. Anom amam wapani manda'am na'amba atin. Ukup amamipi pehafel a'owa' pa'ipa'i amam daiam ama molomam monda' waf awafi. Ea' waf afambai fahambombaga ukup paloma alop amamisi dindi'i dondo' fagwa waf awafi amamifi.

²⁸ Ukup asasipi atip pandaiwa'ma sogahapifa God nomonas asasisi. Isimba atis dei' nape natitilis saila nomonas awami asasimi atoma sanda' waf naninani aunai owa' andeande'ma epes sonda'anaia. ²⁹⁻³⁰ Esis sanda' waf hiafi fafi-fafi awafi fape si'ifa esis. Ukup pehafel pa'ipa'i sogofa' hiahaom hiami ma esis atis. Waf awafi agufifa afamba. Ukup kowagalepa hiahaom bu'wami awami, ukup numbutipa sogaha anis,

* **1:24:** Jer 13:25; Jer 16:19; Ro 9:5
20:13; 1 Ko 6:9

* **1:25:** Lev 18:22; Lev

saha anis daias sagaga', migimigah sambaso'ama sogofa' anom hiahaom anin epeni dowadowafa, ea' sanda' maola sagahambombaga epes. Waf anamba aunai asi'ina endilisi ma esis. Ea' sanda'i'ipamas sa'i basef sawalapefa sogola'asa agof anis daiasi ma nogohnaep epes hiasii. Esis sataga bousi saloma God, gigan sa'oh sa'i digah lu'wami atom, sola'asa basef banagafi sagasa'ma agof asasigufi atogof. Ukup pandanda' ma waf naninani aunai dambainai. Ea' sosambala basef mamasasi. ³¹ Esis sololama gawa bu'wani ma waf bu'wafi ea' sa'i basef andeande', apa' ina saila basef fimba asasifi datima, owa'. Esis ina ukup paipaila anis daias satilis uwahipis, owa'atin. ³² Basefa mu'uli Godi usi'ini na'amba na'i, "Epes sanda' waf na'ambainai esis a' sondaga'." Epes isimba sogawa mu'uli inimba, apa' owa'atin. Sandanda' waf afamba awafi atef. Apa' ina sanda'af dowadowaf, owa'atin. Sasa'ma agofa anis daias sanda' waf awafi na'ambai sandagalas.

2

Basefa kot God anaf nonda'masafi fefe' usi'if atef a'owa'

¹ Ipa' mamahipama pa'i basef pagawaloga anis daiasi, atiasi kofagema ipe'imi atom. Peme', ipa' pa'i basef pagawaloga anis epes daiasi, waf afambai ipa' pandawaloga ipa' atipa. Dei' main, isimba ipa' pa'i basef pagawalogasi, ina' sanda' waf awafii.* ² Apa' mogawa God nonda' kotima epes sanda' waf afambai awafi ma basef

* **2:1:** Mt 7:1-2; Jo 8:7

usi'ifi atef. ³ Apa' epen ina' nagasapaga anis epes deideiasi sanda' waf fafifafi na'ambaifii, epen ina' nanda' waf afambaii. Dei' ina' okom mandanda' ma'imama? Ina' atiasi la'ifinama nindihi'ama basef God nonda' kotimasafi nefa' negafe'? Owa'atin endilisi. * ⁴ God nanda'ena andeande' a'owa', ea' ata' nape nasasaena noga lautai, ina nagwamena waf awafi nase'ena akafimi kwafalis, owa'atin. Waf afamba bu'wafi Godi ina' okom mandanda'maf na'i falafifi? Anen nanda'mena waf afamba bu'wafi ma ata' negambema nembel. A'i ina' negawaf a'a owa'? ⁵ Ina' nanda' du'wanigai ea' dei' ina ata' nembema nembel, owa'. Ina' natama akafimi lu'wami niki kama ina' atina. Ama nemaf okom numbutinai Godi notaga alihina ma kota, noga walog epes hiasi ma basef usi'ifi banagafi ananifi. * ⁶ Nemaf afamba anen nowaloga-masa waf epesi atona atin, nogwamasaf fendahama waf esis sanda'afi. * ⁷ Anis sagape banages atapisa waf bu'wafi sanda' maol solaoma ufi'a'wa sogofa' agof lu'wagufi, sigati mogogala'i ma sogape andeande' lifilafi. ⁸ Apa' anis ukup pandapoma esis atis ea' sowa' alafugaha basef endilisifi saila waf ikiakafi. Epes isimba anaf God okom numbutina a'owa' nindaiwa'masa waf awafi asasifi.*

⁹ Nimanimi lu'wami moloma akafimi anaf mu-pai' epes isimba hiasi sanda' waf awafii hi'ilas. Esis Juda sili' ea' isimba owa' Judaisia wapani sigi' solomas ¹⁰ Apa' God anaf noso'asa poe

* **2:3:** Ef 1:7, 2:9; 2 Pi 3:15 * **2:5:** Mt 16:27; Jo 5:29; 2 Ko 5:10

* **2:6:** 2 Te 1:8 * **2:8:** Ro 1:16

bu'wani ma mogogala'i agof lu'wagufi foloma opalef awanilifi epes isimba hiasi sanda' waf fasifii. Esis Juda sili' ea' isimba owa' Judaisia sigi'. * ¹¹ Dei' main, anen nowaloga epes hiasi ma ikwaf usi'ifi atef.

¹² Anen okom mandanda' na'amba. Epes mamahisa sogololama mu'uli God nagaso' Mosesani sanda' waf awafii, anaf a' higililas. Apa' epes Juda sogogawa mu'uli inimba ea'i ma dei' sanda' waf awafii, anaf nowalogasa mu'uli inimba atin. * ¹³ Ina epes isimba sagame' mu'uli dowadowafi sataga bo'wes hilili'ma naep Godi, owa'atin. Epes mamahisa same' basefa sagaila mu'ulii, isimba atis anaf God ni'i esis bo'wes hilili'i.*

¹⁴ Esis isimba sogololama Godi, waf asasifi na'amba. Esis mu'uli akas, apa' nemaf mamahefa sagaila malogofa nomon nelelemb asasimi, waf afamba a' fataga si'i mu'uli asasimi. Esis mu'uli Godi akas, apa' endilisi sailana waf afamba ma nelelemb asasimi. ¹⁵ Waf afamba asasifi fihimba'mapa basefa mu'uli inimba fagape ukup asasipi. Ea' malogof fagape opalef asasimi nomoni, amamba wapani mihimba'mapa na'amba atin. Dei' main, ukup asasipi pa'ias pihimba'mas alihif na'amba. Anif nimaguf panda' kotimasa waf awafi, apa' anif nimaguf andeande' dondo'ma waf esis sanda'afi. * ¹⁶ Amamba anaf motaga na'amba atina nemaf afamba God nogawaloga waf hiafi epesi. Afamba

* **2:10:** Ef 6:9; 1 Pi 1:17 * **2:12:** Mt 7:21; 1 Jo 3:7 * **2:13:** Ap 10:35 * **2:15:** 2 Ti 2:8

anen ni'i ila ma Jisas Krais nope dembinai nogawaloga waf hiafi asasifi fandambahi'i feloma basef sa'if sagambaho'afi. Basef bu'wafi God ae' agawalapafi ifimba atif.*

Esis Juda sahapifa mu'uli inimba God nagaso' Mosesani atin sa'i mu'uli inimba atiasi a' ne-topalopas

¹⁷ Ipa' pendefala pa'i ipa' Juda pagahipifa mu'uli inimba fowa' God nagaso' Mosesani sisi-hina negatopalopepa pindihi'lama okom wanda-fumi Godi. Ea' ipa' pandasa'ma agof ipe'igufi panda'i, “Apa' mogawa God endilisinai.” ¹⁸ Ea' ipa' pegawa okom God na'i pigagi'mami ma pege-lafa waf mu'uli inimba ma ukup pi'i waf usi'ifi pigailaf. ¹⁹ Ipa' pegawa pa'i ipa' epes pegegawa basef Godi ma pigasindi'amona epes isimba naep pagaso'asi ea' pape si'i nagwapina epes isimba sagape akoti ma pigihimba'mas.*

²⁰ Ipa' epes gawaipai pagawalipa isimba gawa akasi saloma anis daias sogololama basef Godii sagape si'i awasi ata' sa'wisi. Dei' main, ipa' pegawa pa'i basef endilisifi hiafi faloma gawa hiani hi'alas sape mu'uli inimba pelafan pegegawani.*

²¹ Basef ifimba atif hiafi fagali'i dei' fitanima fila ipa'. Ipa' pandawalipa anis epes daias, apa' ipa' owa' ata' pili' piwalipa ipa' atipaia? Ipa' pawalipasa basef anis pa'i, “Ipa' ina a' penda' wal, owa'i”, apa' ae' a'i ipa' wapani panda' wali? ²² Ipa' pawalipasa basef anis pa'i, “Ipa' ina a' pehambombaga waf daso'amaifi, owa'i.” Apa'

* **2:16:** Je 2:19 * **2:19:** 2 Ti 3:5,15; Mt 15:14; Lu 18:9 * **2:20:** Sam 50:16-21; Mt 23:3-4

owa' ipa' wapani panda' waf afambai awafi? Ipa' pandaiwa'ma god baso'amunai, apa' owa' apakwalopa hiahawes saga'oh ifagw epes sanda' lotuma god amamba baso'amii?

Na'ambai ina andeande', owa'. ²³ Ipa' pandasa'ma agof ipe'igufi atogof lu'wagof panda'i, "Apa' mogogawa mu'uli Godii nagaso' Mosesanii." Apa' owa' ipa' pimbisila' mu'uli inimba panda' waf afambai atef dei' pahambombaga agol Godi. * ²⁴ Waf ipe'ifi awef si'i basef fagail buki fa'ias faga'i, "Kofagema ea' ipa' Judai atom, dei' esis owa' Judaisia sogololama Godi sa'i basef sanda' agol Godi findiwagol."*

Waf sogatopa' alopafi ina fatopalopa epes, owa'. Sogahapifa God atona dao', sotaga dambais.

²⁵ Endilisi, i'i ipa' Juda pihapila mu'uli inimba God nagaso' Mosesani pilan endilisi, dao' waf afamba magatopa' alopafi bu'wafi. Apa' i'i ipa' pegawala mu'uli inimba, atiasi a' pelelama God petaga na'amba atin si'i ipa' owa' pegatopa' alopia. * ²⁶ Epes isimba owa' Judaisi sogatopa'mas alopia, esis sagape na'amba. I'i esis sila waf afamba hiafi usi'ifi ma mu'uli inimba, atiasi sotaga si'i isimba sagatopa'mas alopi ma naep Godi. ²⁷ Endilisi, esis owa' Judaisia atiasi sola' basef mila ipa' Juda. Dei' main, ipa' pegawa mu'uli God nagaso' Mosesani nagape buki ea' patopa' alop ipe'ipi, apa' owa' ipa' pimbisila' basefa mu'uli inimba. Apa' esis isimba owa'

* **2:23:** Ais 52:5; Esi 36:20

* **2:24:** Jer 4:4, 9:25

* **2:25:** Ga

Judaisi sogatopa' alopia saila basefa mu'uli in-
imba.*

²⁸ I'i ipa' epes Juda dowadowaf, ipa' ina Juda
endilisipai, owa'. Ea' waf afamba sagatopa'
alopafi ina waf alop atop si'ipi, owa'atin. *

²⁹ Ipa' epes hipai Juda. I'i opalef ipe'ilifi fe-
taga dambailif, ipa' Juda endilisi. Waf sagatopa'
alopafi, God nanda'af opalef ipe'ilifi nomon.
Maol inimba ina natagama basefa mu'uli na-
gail buki, owa'. Ambal bu'unai Ananinai atona
nanda'an. Epen ami nenda'as na'ambai, anin
agol akana nogohnaep epesi, owa'atin. Anin agol
lu'wagola naep Godi atip.

3

Waf awafi ina la'ififa figikila' waf bu'wafi, owa'

¹ Dei' esis Juda sikila' anis daias owa' Judaisia
ma waf maif bu'wafi? Waf bu'wafi maif fatagama
waf afamba magatopa' alopafi? * ² Awasi! Waf
hiafi fasifi fatagaf. Waf fagali'i afamba. God
nali' naso'asa basef ananifi endilisifi atif esis Juda
ma sugumafif. * ³ Endilisi, anis ina sahapifa
basef ifimba andeande!. Owa' dei' ata' si'i main?
A'i waf afamba awasifi asasifi atiasi fenda' God
nokwaha basef endilisifi ananifi? * ⁴ Owa'atin
endilisi. Apa' mi'i basef monda'i, epes hiasi
sagambaso'ami, apa' God atotona naga'i basef
endilisi dondoli, nanda' maol datimai si'i Baibel
naga'i,

* **2:27:** Jo 7:24, 8:39 * **2:28:** Diu 30:6; Kl 2:11; 1 Ko 4:5; 2 Ko
10:18 * **3:1:** Sam 147:19-20; Ro 9:4 * **3:2:** Ro 9:6, 11:29; 2 Ti
2:13 * **3:3:** Sam 51:4

“Atiasi epes amam nematawa hiasi seme' basef ine'ifi si'i endilisifi atif. Nema' afamba esis si'i sonda' kotimina, ina God atiasi nepa'agas nikila'as.”

5-6 Dei' i'ipipa anif basef apa' epes ukup paga'iefi. Basef ifimba na'amba. Dei' ata' mama? I'i waf awafi ape'ifi fawalapai waf usi'ifi Godi fataga alihifai, apa' atiasi mi'ias mi'imama? Mi'i God nanda' waf awafi okom wandafuma nogagwamapa waf awafi ape'ifi? Owa'atin endilisi. I'i God nonda' waf awafiai, dei' anen nowaloga waf amam nematawa hiasi ma main? Owa'atin endilisi. ⁷ Apa' anis epes ukup pandanda' dowaf sambaso'am sa'i, “I'i epes hiasi siti waf baso'afi awafi ape'ifi feloma waf Godi endilisifi ma sowaloga'af, asogawa waf Godi fikila' waf ape'ifi. Ea' waf ape'ifi fawalapai agol Godi lu'wagol. Apa' na'ambaiai, God ina atiasi nogwamapa waf awafi ape'ifi, owa'atin.” Apa' owa'atin endilisi. * ⁸ I'i apa' mila ukup ipimbai atip, mefe' mefe' mi'i, “Awi, apa' a' monda' waf awafi ma mugawalapai waf bu'wafi Godi.”

Endilisi, anis epes sambaso'mas sa'i basef findiwaefa ae' sa'i ae' aga'ias na'amba. Apa' owa'atin. Epes isimba saga'i basef ifimbai, anaf God nogwamasa waf awafi asasifi dondo'af atin.*

Ina anin epen bo'wen hilili' nape, owa'atin

⁹ Dei' si'i main? Basef ifimba doko'ifi kofagefa fa'i main? Fa'i apa' Juda mikila' anis daias owa' Judaisia ma waf bu'wafi, a'a owa'? Owa'atin endilisi. Ae' ihimba'mepa basef ea', waf awafi

* **3:7:** Ro 6:1,15 * **3:8:** Ro 1:18–2:24; Ro 3:23

faso'ala apa' hiapai hi'alapa, esis Juda saloma isimba sogololama basef Godi wapani. * 10 Baibel na'i isimba na'amba na'i,

“Ina anin epen bo'wen hilili' nape, owa'atin endilisi. 11 Ina anin epen negawa waf bu'wafi. Ina anin epen nanda' maol nelaoma God, owa'atin. 12 Epes hiasi sololama ufiaw ea' sataga epes awasis endilisi hi'alas. Aho', owa' anin atitin bo'wena. * 13 Malogof asasimi mandahama si'i nowagah kwambifah sagawa epesa mindihianama alihim magape. Esis sa'i basef hiafi baso'afi faloma basef hiafi fafifi ma sagahasopalo'wa anis epes daias, si'i nombot nagape uguf faha epes sagaga'i. * 14 Dondol ukup asasipi numbutip a'owa' sa'i basef awami atoma sagaso'as nimanimi anis daias. * 15 Esis kwafalis atisa sagaha anis daias sagaga'. 16 Dondol sahambombaga epes hiasi saso'asa akafimi nimanimi hiami. 17 Opalef asasilifi ina fape awanelefa sogape opalef atiflif sogaloma anis epes daias, owa'atin. * 18 Esis ina ukup paipaila God ombal mahasana ma sogaila waf ananifi, owa'atin.”

19 Ea' dei' apa' mogawa basef mamahifa Godi fagape mu'uli anen nagaso' Moses ani fa'i apa' Juda mogape lafelani inimbai mondailan. Owa' ina la'ifipa mailan andeande', owa'. Ea' ina anin epen la'ifina niga'i, “Ae' epen bo'owe hilili'i,”

* 3:9: Sam 14:1-3; Sam 53:1-3; Ekl 7:20 * 3:12: Sam 5:9, 140:3

* 3:13: Sam 10:7 * 3:14: Pro 1:16; Ais 59:7-8 * 3:17: Sam

Owa'atin. Apa' epes hiapai ganimba hiagoma, kofagema mapoma apa' ma naep Godi anaf no-gawalogapa. * ²⁰ Dei' main, waf afamba mogaila mu'uli inimba, owa' anin epen atitin atiasi negefa' agol epen bo'wen hilili' ma naep Godia, owa'. Mu'uli inimba nihimba'mapa waf awafi ape'ifi ea'.*

Epen nagahapifa Kraisi, anin agol gataga epen bu'wani Godi

²¹ Apa' dei' waf usi'ifi Godi ea' fataga alihigima fandawalap. Afamba ina fataga fagi'ma waf sanda' maol sa'i sogaila mu'uli fowa' God nagaso' Mosesani, owa'atin. Afamba fataga ano'w ufa'w na'amba. Basef hiafi Godi fagail Buki fawalapai waf afamba. Anif fail mu'uli inimba God nagaso' Mosesani ea' anif amom profet hi-ami manda'afi. * ²² Waf afamba na'amba. Epen nagahapifa Jisas Kraisi, inimba God no-falan na'i epen bo'wen hilili'i. Ea' apa' epes hiapai mogahapilafi hi'alapa, God nanda'apa na'amba atin, esis Juda saloma isimba owa' Judaisia wapani. * ²³ Apa' epes hiapai hi'alapa manda' waf awafi mumbisila' mu'uli Godi ea' ina la'ifipama atiasi mogati mogogala'i bu'wami ananiami, owa'atin. * ²⁴ Apa' owa' God nati apa' uwahipipa, natopalopapa dowaf. Apa' mahapifa Kraisi Jisas ea' God na'i apa' bu'upai. Apa' ina maso'ana anis maefah matalona, owa'atin. Anen

* **3:19:** Sam 143:2; Ro 7:7; Ga 2:16 * **3:20:** Ap 10:43 * **3:21:** Ro 1:17; Ga 2:16 * **3:22:** Ro 3:9, 5:2 * **3:23:** Ro 5:1; Ef 2:8

natopalopapa ma Krai Jisas ea' natagwahepa natalepa ma mogape wahifipa.*

²⁵ God nihimba'masana alihina amam nematawa hiasi na'amba. Anen naga' esimbel ananimbeli balo bali'amona okom wandafunai Godi ma bagakwaha waf awafi epes mamahisa sagahapifanai. Ga' Krai Jisasi atin dei' God nihimba'mapa waf ananifi usi'ifi hilili'i na'amba. Fowa' nanda' esis amam nematawa sa'ombemas ea' ina nogwamasa waf awafi esis sanda'afi, owa'. ²⁶ Apa' dei' dao', anen nihimba'mapa waf usi'ifi ananifi ea' fataga alihigima ma nogagwamasa waf awafi asasifi. Isimba atis dei' apa' mogawa anen usi'ina hilili' hi'agalanai ma noga'i epes mamahisa sogahapifa Jisasi bo'wes hilili'i.*

²⁷ Ea' dei' apa' ufiaw akapa ma mogasa'ma agof ape'igufi atogof lu'wagof, owa'atin. Ufiaw akwamba ea' kwaso'. Main da'im mahefa ufiaw akwamba? A'i waf afamba magaila mu'uli God nagaso' Mosesani? Owa'atin endilisi! Waf magahapifa Jisasafi atef fahefa ufiaw akwamba. *

²⁸ Ea' apa' mogawa epes mamahisa sagahapifa Jisas atini, God na'i esis atis sataga bo'wes hilili', apa' esis sanda' maola sogaila mu'uli inimbai, owa'atin.*

²⁹ Dei' mama? A'i God anen Dembinai esis Judai atona? Owa'atin. Anen esis isimba owa' Judaisia wapani. * ³⁰ Dei' main, God anen ea' anamba atona. Anen na'i basef atifif fafe'ma epes hiasi. Epes ami sogahapifa Krai Jisasi, atiasi God

* **3:24:** Ef 1:7 * **3:26:** 1 Ko 1:31 * **3:27:** Ga 2:16 * **3:28:** Ro 10:12 * **3:29:** Diu 6:4; Ro 4:11-12; Ga 3:20

ni'i esis isimba bo'wes hilili'i, esis Juda saloma isimba owa' Judaisia wapani. * ³¹ Isimba atis dei' hapif inimba apa' ina mi'i apa' mapa'aga mu'uli inimba God nagaso' Mosesani, owa'atin endilisi! Apa' mahapifa Krajs Jisas dei' mawalapa basef kofagefa ma mu'uli inimba.

4

God na'i Abraham nahapifana endilisi dei' nataga bo'ona hilili'

¹ Apa' mi'i basefa Abraham akunamapa apa' Judai mi'imama? Anen nanda' maina God naga'i anen bu'unai? ² I'i Abraham a' endilisi ma nonda' maol bu'wani ma dei' nagataga aman bo'ona hilili'ai, dao' anen a' nondagala nosa'ma agol ananigili atogol lu'wagol. Apa' naep Godi owa'. * ³ Baibel na'ias na'imama? Naga'ias na'amba na'i, "Abraham nahapifa God ea' okom mandanda'ma hapif inimba na'i anen bo'ona hilili'."*

⁴ Apa' mogawa epes sanda' maoli ma sogofa' hi-ahawesa maoli, hiahawes isimba ina mi'ias mi'i mogofa'as dowaf si'i preseni, owa'atin. Isimba hiahawes sagatopa' maolasi atis. ⁵ Apa' God ina nati maol bu'wani epes sanda'ani ma niga'i esis bu'wasi, owa'atin. Anen nati epen mamahina nagahapifana la'ifinai ma nogofala epes sanda' waf awafii bo'wes hilili'i. Ea' God okom mandanda'ma okom epeni maga'i endilisi atis epen inimbai dei' na'i anin bo'wen hilili'i. ⁶ Fowa' Devit wapani nanda' anif basef fail buk Baibela

* **3:30:** Mt 5:17; Ro 8:4 * **4:2:** Jen 15:6; Ga 3:6; Je 2:23 * **4:3:** Ro 11:6

epes mamahisa God natilis naga'i bo'wes hilili'i, isimba a sandagala. Esis ina sanda' maol, owa'. Sahapifana atin dei' na'i esis bo'wes hilili'. *

⁷ Devit nanda' basef ifimba na'i,

“Epes ami God nagakwaha waf awafi asasifi okom magaso'anafi ma nagaofana awami asasimi, epes isimba sonahas. ⁸ Epes ami Dembinai owa' okom mopoma waf awafi asasifia, isimba sonahas.”*

⁹ Epes isimba Devit na'i sonagahasi, epes isimba sagatopa' alopi atis? Owa'atin. Isimba owa' sogatopa' alopia wapani. Dei' main, doko' ae' a'ipipa Baibel naga'i na'amba na'i, “Abraham nahapifa God, ea' God okom mandanda' ma hapif inimba na'i anen bo'ona hilili'.”

¹⁰ Dei' Abraham nape si'i maina God okom mapomana naga'i aman bu'unai hilili'i? Anen nali' natopa' alop ea' a'a ata' owa' ata' notopa' alopa? Anen ina dei' natopa' alopa God naga'i anen bo'ona hilili'i, ata' owa'atin. *

¹¹ Fowa' Abraham nali' nahapifa God nofalana epen bu'unai hilili'i. Ama main, nagi' natopa' alop. Waf afamba nagatopa' alopafi anol ametal God nihimba'mana na'amba na'i nemaf afamba ata' owa' notopa' alopa, a' na'i anen aman bu'unai nagahapifa Godi. Isimba atis dei' anen nataga akunama epes hiasi nagahapifa Godi owa' sogatopa' alopia. Esis sahapifa God atin, nofalas epes bu'wasi. * ¹² Ea' anen akunama epes isimba Juda sagatopa' alopi wapani. Apa' esis ina satopa' alop atop, owa'. Esis sagi'ma bo'wagah Abrahami

* **4:6:** Sam 32:1-2

* **4:8:** Ro 4:3

* **4:10:** Jen 17:10-11

* **4:11:** Mt 3:9

sahapifa God si'i fowa' anen nagahapifana no-gota atamba ata' owa' nogatopa' alopa.*

Basef God nagala' lapafi ma epes hiasi saga-hapifanai

¹³ Fowa' gani God na'i basef nala' lap nagaloma Abraham na'i, "Ae' anaf ese'ena itap hiagoma ina' neloma esis bafasena akusena inel'isi wapani."

Apa' Abraham ina naila mu'uli anaf God no-gaso' Mosesani ma dei' God nala' lap nalomana naga'ipana basef ifimba, ata' owa'atin. Abraham nali' nahapifa God dei' nofalana aman bo'ona hilili'i na'ipana basef ifimba. * ¹⁴ Anif basef fatopalopa ifimba fagali'i na'amba fa'i, I'i epes sagaila mu'uli mamahina Godi ma sofa' hiahaom amamba God nogaso'asamiai atiasi waf afamba mogahapifa Godafi a' fenalo ea' basef ifimba lapafi Godi wapani a' owa' banagefa, ea' owa'atin.

* ¹⁵ Dei' main, mu'uli inimba nigihimba'mapa okom numbutimi Godi ma nogaso'as akafimi isimba sogasambala mu'uli inimbai. I'i apa' owa' mila basefa mu'uli inimbaia, God okom wandafuna nopomapa. I'i mu'uli inimba owa'ai, God ina a' ni'i epes sumbisila' mu'uli inimba satopa'an, owa'atin.*

¹⁶ Abraham nahapifa God. Isimba atis dei' God na'ipana basef ifimba lapafi bu'wafi ma apa' mogogawa endilisi God na'ipas basef ifimba wapani na'i apa' hiapai bafapa Abrahami,

* **4:12:** Jen 17:4-6; Jen 22:17-18; Ga 3:29 * **4:13:** Ga 3:18

* **4:14:** Ro 3:20, 5:13; Ro 7:8 * **4:15:** Ga 3:7

naso'apaef dowaf si'i presen. Ina naso'asef epes isimba sagaila mu'uli inimba atini, owa'. Epes mamahisa sagahapifa God na'amba atin si'i Abrahami, esis wapani. Anen nali' nahapifa God nataga bafamapa nali' naumb nagali'i ma apa' hiapai mamahepama dei' magi' magahapifa Godi. * ¹⁷ Si'i Baibel naga'i, God fowa' na'ipa Abraham naga'i, "Ae' enda'ena nepe bafama isimba misi'ah epes hiasii."

Abraham anen bafamapa ape'inai ma naep Godi. Anen nahapifa God atona nagaso'asa ambal namili epes sagaga'ii, a nogofala hiahawes hiasi ata' owa' sogatagaia si'i sataga sagape ea'i.*

¹⁸ Abraham ina dei' nati hiahawes isimba God na'ipanas ea' na'li nonda'asi. Apa' owa', anen nahapilif endilisi si'i nagatilis ea'i. Isimba atis dei' nataga "Bafama esis amam nematawa misi'ah hiasi."

Si'i fowa' God na'ias ea' naga'i, "Owagama esis mini'ap wambota ine'isi sogataga na'amba."*

¹⁹⁻²⁰ Abraham hagona ea' felefele'ma afagof 100-pelaiguf alop ananipi a' pala'of si'i nagaga'i. Ea' waulu'mana Sera a' hage'w wapani asa'w ina la'ifi'wa kogola awasi, owa'. Abraham okom mapoma isimba, apa' okom ananiami banagami nogogawa God endilisi ina mowala, owa'atin. Anen nahapifa God banagambela basef God nagala' lapafi ma hiahawes anaf sigi' sogatagai. Hapif atin nanda'ana banagona ea' nafela agol Godi lu'wagol. ²¹ Anen nahapifa God endilisi ma

* **4:16:** Jen 17:5; Ais 48:13 * **4:17:** Hi 11:1; Jen 15:5 * **4:18:** Jen 17:17

nogogawa anen la'ifinai ma nonda'as na'amba si'i fowa' na'i nonda'asa basef ifimba nagala' lapafi. * 22 Isimba atis dei' God a' okom mapoma hapif ananini ea' na'i, "Anen epen bo'ona hilili'i."

23 Fowa' amom profet manda' basef ifimba fagape Baibeli faga'i na'amba fa'i, "God okom mapoma anen epen bo'ona hilili'i."

Amom ina manda' basef ifimba ma Abraham atona, owa'atin. * 24 Manda'efa apa' wapani. Apa' mahapifa God nasa'ma Jisas dembinai ape'inai nogosafel matmati. Isimba atis atiasi God okom mondanda'ma hapif ape'ini a' ni'i apa' be'epa hilili'i. * 25 God nasapa' Jisas nafi'i naga'ma nagakwaha waf awafi ape'ifi. Ea' nasa'mana matmata noga'i apa' amam nematawa be'epa hilili'i.

5

God na'i apa' amam nematawa be'epa hilili'i

1 Basef kofagefa fape fagali'i ifimba, hapif ape'ini atin dei' God nofalapa epes be'epa hilili'i. Isimba atis dei' Dembinai ape'inai Jisas Krais nanda'apa mape opalef atelef awanelef maloma God. * 2 Anen atona ufa'wa apa' mahapifana mogape nomona okom Godi magamagaila apa' a'owa'i, natopalopapa dowaf nambemapai dei' magape andeande'mami. Apa' mogawa endilisi mape mohafa anaf God nofa'apa mope molo-mana mugati mogogala'i ananiami. Hapif inimba

* 4:21: Jen 15:6 * 4:23: Ro 15:4; 1 Pi 1:21 * 4:24: Ais 53:4-5; 1 Ko 15:17 * 5:1: Ro 3:24,28, 4:24; Ef 2:18, 3:12

nanda'apa sonahapa ma amamba. * 3 Apa' ina sonahapama amamba atom, owa'atin. Apa' sonahapama nimanimi mogatagamapa wapani. Dei' main, apa' mogawa mofa'ama mogowa' banagapa wapani. 4 I'i apa' mulutu banagepama gwamba, God niga'i aho'mapai. Isimba atis dei' apa' mogawa endilisi anen nigaila basef ananifi datimai ma notopalopapa mope mogohafa' mogogala'i banagami ananiami anaf mogatagai.

* 5 I'i apa' mogawa endilisi na'amba, gawa ape'ini ina atiasi nenalo, owa'. Dei' main, God naso'apa Ambal bu'unai Ananinai ea' waf okom magamagailapafi fape lu'ufo opalef ape'ilifi.

6 Fowa' apa' ina banagepa ma monda' waf bu'wafi, owa', nogota atamba God nandandepata ea'i, Krais naga'ma apa' mogowa' alafugaha Godi. 7 Ipa' ukup pandanda' pa'imama? Anin epen na'i nega'ma negatopalopa epen ami na'i nigaila mu'uli Godi, a'a owa'? A'i atiasi ina anis si'i aho', owa'atin. Apa' i'i anin epen bo'wen hilili'i, dao' anin ila ma nega' negatopalopa epen inimba bu'wani. * 8 Apa' ata' manda' waf awafi atin, Krais naga' natopalopapa. Ea' dei' God nihimba'mapa okom lu'unai naganagaila ape'i nandawalap. Krais a nikila' epen inimba bo'wen hilili'i naga' natopalopapa.*

9 Anen naga' esimbel ananimbeli balo dei' God nofalapa amam nematawa be'epa hilili'i. Isimba atis dei' apa' a' mogawa endilisi atis Krais natagwahepa ma okom wandafunai Godi.

* 5:2: Je 1:2-3; 1 Pi 1:5-7

* 5:4: Sam 22:5, 25:20; Hi 6:18-19

* 5:7: Jo 3:16; 1 Jo 4:10

* 5:8: Ro 1:18, 2:5,8

* 10 Fowa' apa' ata' mape boupai Godi, owa' dei' nanda'apa mataga alipipai ananipai opalef atifilif malomana. Anen nanda'as na'amba ma Nogamana ananinai nagaga'ma apa'. Isimba atis dei' apa' mape alipipai Godi mogawa endilisi Krai nape namona ma dei' motanima molomana sisihipa mogape. 11 Apa' ina isimba atis, owa'. Apa' mondagala ma God. Dei' main? Fowa' apa' boupai ma anen apa' dei' Dembinai ape'inai Jisas Krai nali'amona naumbih ape'imi nanda'apa mataga alipipai malomana. Ea' dei' sonahapama anen.*

Adam nawalapai ga', apa' Jisas nawalapa ambal namili

12 Apa' mogawa isimba. Aman atotona nali' nanda' waf awafi, dei' waf awafi fape nelelemb amam nematawa itapasi. Ea' dei' waf awafi fahokolai ga' nafi'i, dei' ga' nefa' epes hiasi hi'alas saga'. Dei' main, epes hiasi ea' sanda' waf awafi hi'alas. * 13 Fowa' gani nogota atamba God ata' owa' noso'anai mu'uli ananini Mosesa, waf awafi fali' fataga fape itap ana'e. Apa' i'i basefa mu'uli inimba owa'atinai, dei' God ina a' nowaloga epesa waf awafi asasifi, owa'atin. * 14 Apa' ga' nataga nape nogota atamba Adami nafi'i nataga nogota Mosesi. Epes isimba hiasi ina sogawa mu'uli God nagaso' Mosesani, owa'atin. Apa' owa' ga' nahapilas sisihis hi'alas. Fowa' God naso'ana mu'uli ananini Adam, owa' Adam natolapan. Anis epes daias ina sumbisila'an si'i

* 5:9: Ro 8:7-8 * 5:11: Jen 2:17; Jen 3:6,19; Ro 6:23 * 5:12: Ro 4:15 * 5:13: 1 Ko 15:21-22; 1 Ko 15:45

Adam nagatolapan, owa'. Apa' ga' nahapilas wapani. Aman anamba Adam nondola'waifa aman anamba Dembinai atona nigi' nogatagai.

¹⁵ Waf God nagatopalopapa dowafafi ma Jisas Kraisi faloma waf awafi Adam nanda'afi, ina na'amba atin, owa'atin endilisi. Aman anamba Adam atotona nanda' waf awafi, dei' nanda' epes hiasi saga'. Apa' God nagatopalopapa dowafi, amamba mataga lu'um a'owa' ma aman atotona Jisas Kraisi. Ea' apa' dei' mofa' hiahawes isimba presen Godi nikila' ga' inimba ea' nataga lu'una a'owa' ma nagatopalopa epes hiasi. ¹⁶ Waf bu'wafi God nagatopalopapa dowafafi afamba ina fape atogon faloma waf awafi aman anamba atotona nanda'afi, owa'atin endilisi. Aman anamba nanda' waf atetef awafi. Ea' God nawaloga apa' epes hiapai na'i, "Ipa' awepa hi'alepa a'owa'."

Apa' manda' waf awafi hiafi apa' God okom maimailapa natopalopapa dowaf ea' na'i apa' epes be'epa hilili'i. ¹⁷ Aman anamba atotona nanda' waf awafi. Isimba atis dei' ga' nesafel nowalo' epes hiasi hi'alasa anen atona. Apa' maol aman anamba atotona Jisas Kraisi a' lu'win banagen a'owa' nikila' ga' ma nagatopalopa epes mamahisa God natopalopas dowafa sogofa' waf usi'ifi hilili'i, epes isimba atiasi sope namisa sogape dembesi.*

¹⁸ Dei' apa' magape na'amba. Fowa' waf awafi atetef fanda' apa' hiapai higilalapa hi'alapa. Ea' na'amba atin waf usi'ifi atetef fatagwahepa ma

* 5:17: 1 Ko 15:22

waf awafi fanda'apa dei' mape namepa. *
 19 Aman atotona nosambala basef Godi dei' apa'
 hiapai mape manda' waf awafi. Ea' na'amba
 atin aman bu'unai atotona naila basef ifimba,
 dei' apa' hiapai motaga usi'ipa hilili' ma naep
 Godi. * 20 Ama main, mu'uli inimba God
 nogaso' Mosesani natagama esis sogogawa waf
 asasifi awafi sagatopa' mu'uli inimba. Apa'
 esis ina sakwaha waf afamba awafi, owa'atin.
 Sanda'af hiafi a'owa'. Apa' owa', ufiaw God
 nagatopalopa esisa'w dowafi kwataga lu'ukw
 a'owa' ma esis. * 21 Fowa' waf awafi fataga
 fape ilifa apa' hiapai dei' maga'. Apa' dei' waf
 God nagatopalopapa dowafafi fape ilif a'owa' fik-
 ila'. Anen natopalopapa ea' nofalapa amam ne-
 matawa usi'ipa hilili'i ma mogofa' ambal namili
 lagape lifilafi dondoli ma dembinai ape'inai Jisas
 Krai.

6

*Apa' maga' ea' ma waf awafi, owa' Krai
 natopalopapa mataga wahifipa*

1 Ea' dei' apa' monda' basef maif wapani? Apa'
 mondanda' waf awafi atapipa ma atiasi waf God
 nogatopalopapa dowafafi feगतaga lu'wif a'owa'?
 Apa' mi'ias na'amba a'a owa'? * 2 Owa'atin
 endilisi! Waf awafi atef, dei' apa' maga' ea'. Dei'
 maina apa' ata' magafe' waf afambai awafi atef?

* 5:18: Ais 53:11 * 5:19: Ro 4:15; Ga 3:19 * 5:20: Ro 6:23

* 6:1: Ro 3:5-8; 1 Pi 4:1

Owa'atin, hapaifi. * ³ Ipa' pegawa apa' mamahepama mogofa' sa'ofa magape mandaloma sisihipama Kraisi Jisasi ea' mofa' sa'of maloma ga' ananini. * ⁴ Sa'of inimba apa' mandaloma sisihipa maloma ga' Jisasi, God nawapa maloma Kraisi matmat. Banagami fasimi ahamanai atom masa'ma Kraisi nosafel matmat. Ea' na'amba atina apa' mosafel wapani mape banagepa mogafe' waf dambaifi ma ambal namili itap apa'e.*

Apa' dei' mape namepa maloma Kraisi ea' anaf mosafel wapani molomana

⁵ Apa' mandaloma endilisi tatala'ipa maloma anona ga' inimba ananini si'i anen nagaga'. Ea' na'amba atin anaf mandaloma tatala'ipa mosafel wapani molomana. * ⁶ Apa' mogawa opalef apimi ape'imi amamba maga' mail lawag usi'igai ti'wanaegai maloma Kraisi ea' God natalogofa banagami waf aunai manda' maol magape alop ape'ipii. Isimba atisi dei' waf awafi ina fawasi'apa sisihipa wapani, owa'. * ⁷ Dei' main, anona aman nagaga'i, waf awafi ina ata' fahapilana sisihina wapani, owa'.

⁸ Aho', apa' maga' maloma Kraisi. Ea' mogawa endilisi atiasi mope ambal namili molomana wapani. ⁹ Apa' mogawa God nasa'ma Kraisi nosafel matmat ea'. Isimba atisi anen ina atiasi noga' wapani, owa'. Ga' ina banagen a'owa' negatalogofa anen, owa'atin. * ¹⁰ Anen naga' atetef ea' ma'um. Ga' inimba atin anen nahambombaga

* **6:2:** Ga 3:27 * **6:3:** Kl 2:12 * **6:4:** Fl 3:10-11 * **6:5:** Ga 5:24 * **6:6:** 1 Pi 4:1 * **6:9:** Hi 9:26-28; 1 Pi 3:18

banagami amamba waf awafii mowala hi'alam. Anen dei' nape ambal namili naila okom Godi atom. * 11 Ea' na'amba atina ipa' wapani a' ukup pendapoma ipa' atipa paga' ea' pakwaha waf awafi si'i sagaga'i. Ipa' ukup pendapoma ipa' ea' pape sishipa paloma Krai Jisas pape namipa paloma God.*

12 Ipa' ina pi'i aho'ma waf awafi fepe fetaga banagef femafi ipa', owa'i. Na'amba waf afamba awafi fehende'epa a pila waf alop atopafi. *

13 Ipa' ina peso' lagof bo'wagah ipe'isi sefe'ma penda' waf awafi, owa'i. Pendaso'anas God atona soloma nomonas ukup ipe'isi hi'indalasa anen atona si'i epes sotanima sogosafel matmat wapani sagape namis. Ea' ipa' pese'ana alop du'wa'wanipi hi'indalapa Goda penda' waf usi'ifi. * 14 Ipa' pegawa waf aunai ina ata' nope lu'unama ipa' wapani, owa'i. Dei' main, ipa' dei' ina ata' pape lafela mu'uli inimba God nagaso' Mosesani ma pigailan, owa'atin. Ipa' apape lafela ufia'w Godi ato'w okom maimailapa ma nagatopalopapa dowaf.*

Apa' dei' mape manda' maola waf usi'ifi

15 Ea' dei' apa' ata' monda'as mi'imama? Apa' ina mape lafela mu'uli inimba God nagaso' Mosesani, owa'atin. Apa' dei' mape lafela ufia'w akwamba God nagatopalopapa dowafa'wi. Ea' dei' apa' monda' waf awafi a'a owa'? Owa'atin

* 6:10: 2 Ko 5:15; Ga 2:19; 1 Pi 2:24 * 6:11: Jen 4:7 * 6:12: Ro 12:1; Ef 2:5, 5:14 * 6:13: 1 Jo 3:6 * 6:14: Ro 6:1

endilisi! * 16 I'i ipa' peso' ipa' atipa penda' maol pepe lafela aman ami, ipa' pape sisihipama anen atona. I'i ipa' peso' opalefa waf awafi, ipa' pape lafela waf afamba fawasi'ipa sisihipa paga'. Apa' i'i ipa' peso' opalefa waf bu'wafi, dao' pape lafela God pataga usi'ipa hilili' ma naep ananipi. 17 Endilisi, fowa' ipa' pape lafela waf awafi fawasi'ipa sisihipa. Owa' God nanda'epa pape lafela basef ananifi pailif ea' paso'ana ukup nelelemb hi'alasa pagaila basef ifimba endilisifi ipa' pigalafafi. Ea' apa' mundanifela God. *

18 Anen natagwahipa ma banagami waf awafii, dei' pataga epes panda' maol pape lafela waf usi'ifi fawasi'ipa sisihipa. 19 Ukup ipe'ipi ina dei' banagep, owa'. Isimba atis dei' aila ukup apa' epesi a'ias alihis a'i. Fowa' ipa' ata' paso' alop ipe'ipi du'wa'wanip pape lafela waf awasif alugufi faloma waf hiafi sogosambala mu'uliefi ea' fawasi'ipa sisihipa. Apa' dei' peso' alop wa'awa'api hi'ilap pondafe'ma waf usi'ifi fi-wasi'ipa sisihipa ma pegape Godi atipa si'ipa.

20 Fowa' ipa' ata' pape lafela waf awafi fawasi'ipa sisihipa ea' nogota atamba ipa' ata' pape pelelama waf usi'ifi. * 21 Ipa' pefa' hiahawes mais fasisi ma waf awafi fowa' panda'afi, ma dei' ipa' ambagof awagufafi? Owa'atin. Waf afambai fagawalapai ga' atini. 22 Owa' dei' God natagwahipa ea' ma waf awafi nanda'epa pape panda' maola anen pape lafelana atapipa. Maol inimba atiasi netaga nela gwa'aisi isimba. Ipa'

* 6:15: Jo 8:34; 2 Pi 2:19 * 6:17: Jo 8:32 * 6:20: Ro 7:5, 8:6,13

pepe be'epa hilili' ananipai atipa ma pegefa' ambal namili andeande' dondol lifilafi. * ²³ Waf awafi fagwamasa awami ma isimba sanda' maola waf awafii. Awami amamba. Esis atiasi soga' atin higililas. Apa' God dei' naso'apai presen fasini dowaf, inimba ambal namili lagape dondoli ma mope sisihipa mogoloma Krais Jisas.

7

Basef waminif atina waf sandaso'amafi fa'ipapa dei' manda' maola waf bu'wafi ma opaf dambaifi

¹ Ipa' alipipai, ipa' pegawa mu'uli ma waf daso'amaifi ea'. Ea' pegawa andeande'ma basef ifimba dei' iga'ipipafi. Nogota atamba epen ata' nagape namin, anin ata' nape lafela mu'uli inimba. ² Basef kofagefa ma mu'uli inimba ifimba. I'i ano'w nemata'w kwagaso' amani, ma anen ata' nogape namona, mu'uli inimba ata' newa'ana naloma ako'w ata' sape sisihis. Apa' i'i waulunama'w nogaga', dao' mu'uli inimba naga-hapilasi pele'atan kwape wahifi'w. ³ Ea' i'i anen aman ata' nope ambal lapaona ma waulu'mana kofe' kogaso' anona aman daiana, ea' sofala'w si'i ako'w kwanda' waf awafi so'a waola anona aman daianai. Apa' i'i aman akwa'unai nogaga', mu'uli inimba ina ata' nahapilas sisihis wapani, a' owa'. Ako'w kwandatagwah kwape wahifi'w. Esis ina si'i basefa ako'w si'i ako'w kwanda' so'a wauli, owa'atin.*

* 6:22: Ro 5:12,15 * 7:3: Ro 6:2,11; Ga 2:19

⁴ Ipa' alipipai ae'ipai, ae' a'i i'ipipa basef ifimba kofagefa. Apa' hiapai mape sisihipa maloma Krai ea' isimba atis dei' maga' ea'. Dei' mu'uli inimba God nagaso' Mosesani ina ata' nahapilapa sisihipa wapani, a' owa'. Apa' ea' mape sisihipama anona aman God naso'mana nogosafel matmat wapanii ea' monda' maol ananini atin. *

⁵ Fowa' ata' magape atapipa opalef apimi, mu'uli inimba nafilai ukup awami ma alop ape'ipi. Ea' manda' maola waf awafi fataga ma ga' atin. *

⁶ Apa' dei' maga' maloma Krai makwaha hiahaom magahapilapa sisihipai. Ea' mu'uli inimba ina ata' newa'apa wapani, owa'atin. Mape wahifipa. Dei' apa' ina ata' manda' maol maila mu'uli inimba anom manda'an nagail buki, owa'atin. Apa' manda' maola waf dambaifi Ambal bu'unai Godi nanda'afi. *

Waf awafi fahambombaga apa'

⁷ Dei' apa' ata' mi'ias mi'imama? Mi'i mu'uli atin waf awafini a'a owa'? Owa'atin endilisi! Mu'uli inimba God nagaso' Mosesani nihimba'me waf maif awafi kofagefa ma egegawaf. Waf afamba kowagalasafi fagape na'amba. Mu'uli inimba naga'ias na'amba na'i, "Ina kowolena ma anis hiahawes anona amani, owa'i."

I'i mu'uli inimba owa' nihimba'me na'ambaea, ae' ina egawa waf awafi kowagalasafi. Apa' owa', owa'atin. * ⁸ Mu'uli inimba si'i ano'w ufa'wa waf awafi fagasa'mai okom naninani

* **7:4:** Ro 6:21 * **7:5:** Ro 8:2, 6:4 * **7:6:** Eks 20:17; Diu 5:21

* **7:7:** Ro 4:15

nanda' ae' kowagalema hiahaom hiami. Apa' mu'uli inimba owa'atinai, waf awafi si'i fagaga'i atef. * 9-10 Fowa' gani mu'uli inimba ata' owa', nogota atamba ata' ape okom mase'e elelama waf awafi. A'i owa' main owa', basef kofagefa ma mu'uli inimba fafi'mai ae' ea' waf awafi fesafel fafe' ambal ae'ali ea' fahe aga'ma mu'uli inimba. Doko' li' God nanda' mu'uli ananini ma nogase'e ambal namili owa', ae' ina' efa' ambal namilima mu'uli inimbai, owa'. Anin nahe andaga' atin. *

11 Dei' main, waf awafi fasopama ufia'wa mu'uli inimba ea' fambaso'me. Mu'uli inimba nasa'ma okoma ae' nihimba'me waf awafi fahe aga'. *

12 Ea' apa' mogawa mu'uli atin, anin bo'wen hilili'i. Basef ifimba hiafi fagape mu'uli inimbai wapani be'ef hilili'i.*

13 Dei' a' main wapani? A'i mu'uli inimba fasini nahe aga'? Owa'atin endilisi! Waf awafi atef fahe aga'. Apa' hiahawes isimba si'i ano'w ufia'wa waf awafi fahe agaga'i ma waf afamba awafi kofagefa fetaga fendawalap. Ea' mu'uli inimba nihimba'mapa waf awafi kofagefa, afamba ea' awef endilisi a'owa'.*

Waf awafi fala'ata ukup ape'ipi

14 Apa' mogawa mu'uli inimba nafi'i Ambal bu'unai Godi nihimba'mapa okom ananini. Apa' ae' okom apinai nape ina aila okom Godi, owa'. Waf awafi fala'atae anda' maola waf anamba aunai. * 15 Apa' dei' ae' ina egawa waf kofagefa

* 7:8: Je 1:15; Lev 18:5; Ro 10:5 * 7:9-10: Jen 3:13; Hi 3:13

* 7:11: 1 Ti 1:8 * 7:12: Ro 5:20 * 7:13: Sam 51:5; Jo 3:6

* 7:14: Ga 5:17

anda'afi, owa'. Waf ae' okom ma'ima'iaf a'i enda'afi, afamba ina anda'af, owa'. ¹⁶ Okom ae'ami atom a'ias na'amba a'i aho'ma mu'uli inimba bu'wani ma eme'an igailan. Apa' owa', owa'atin. Ina ailan, owa'. Atolapan anda' waf awafi andaiwa'ma enda'afi. ¹⁷ Apa' ina ae' atowe anda'an, owa'. Waf aunai nagape okom ae'anai nomoni, anamba atona nanda'am. * ¹⁸ Ae' egawa okom ae'anai nomon, ina anom nomonas bu'wami mape, owa'. Opaf anamba apinai ae'anai atona nahambombage. Endilisi, ae' okom ma'i enda' waf fasifi atef, apa' owa'. Ina la'ifiwi anda'af, owa'. ¹⁹⁻²⁰ Aho', waf fasifi okom ma'i enda'afi, afamba ina anda'af, owa'atin. Apa' waf awafi andaiwa'ma enda'afi, afamba atef anda'af. Ea' ae' egawa ina ae' ela okom anda' amamba, owa'atin. Waf awafi fagape opaf ae' nomoni, afamba atef fanda'e anda'am.

²¹ Isimba atis dei' ati waf na'ambaifi fape ae'. Okom ma'i enda' waf fasifi, apa' waf awafi fagape nomonas ae'ami anda'af. ²² Endilisi okom ae'ami ma'ima'i mu'uli inimba God nagaso' Mosesani a'owa' andagalaman. * ²³ Apa' owa', ati anef waf daiaf fape alop si'ip wa'awa'ap ae'api nomon. Ea' waf afamba fapa' faloma mu'uli inimba nagape okom ae'amii. Waf afamba atef fagape alop wa'awa'ap ae'apii fala'atae fanda'e anda' maola waf afamba awafi. ²⁴ Ea' owahipiwi! Ae' epen dagala akai, okom nimanimiwai. Atiasi ami netagwahowe ma opaf apinai dei' nahe agaga'i? * ²⁵ Owa', ae' anifela God! Anen atona nanda'

* **7:17:** Jen 6:5, 8:21 * **7:22:** Ga 5:17; Je 4:1; 1 Pi 2:11 * **7:24:** 1 Ko 15:57

Jisas Kraisi Dembinai ape'inai natagwahowe ape wahifiwi.

Dei' ape na'amba. Okom ae'ami atom, ape lafela mu'uli inimba, apa' opaf apinai ape lafela banagami waf awafii.

8

Krais nakwahomapa waf awafi ea' naso'apa Ambal bu'unai Godi apa'

¹ Basef ifimba fagali'i kofagefa ifimba. Apa' amam nematawa mape sisihipa magaloma Kraisi Jisasi, ina ata' anif basef dei' ma God nonda'mapa kota basef lu'wafi mogofa' akafimi ma waf awafi apa' manda'afi, owa'atin. * ² Dei' main, banagami Ambal bu'unai Godi nagaso'apa ambal namili ape'i, anen natagwahepa ma banagami waf awafii maloma banagami ga'i. Anen nanda'am na'amba ma Kraisi Jisasi atona ea' mape sisihipama anen dei' mape wahifipa. * ³ Maol mamahina mu'uli inimba God nagaso' Mosesani owa' banagena nenda'ania, God nanda'an. Dei' main, opalef apa' epesi pupulim, owa' banagema. Dei' God nanda' maol inimba na'amba. Nasapa'i Nogamana ananinai atona nafi'i nataga si'i apa' epes manda' waf awafii. Ama nokwahomapa waf awafi hi'ilaf okom mogaso'anaf dogw. Anen nafi'ima nogokwaha waf awafi apa' epesi feloma akafimi ma waf afamba ea' God naso'anam mapoma anen atona. * ⁴ Anen nanda'am na'amba ma apa' mofe' mogaila waf be'ef usi'ifi

* **8:1:** Ro 7:23-24 * **8:2:** Ap 13:38, 15:10; Fl 2:7; Hi 4:15 * **8:3:** Ga 5:16,25

fagape mu'uli inimbai. Dei' main, apa' dei' ina mafe' maila fe' inimba opalef apilifi, owa'. Mafe' maila fe' dambaini Ambal Godi.

⁵ Epes sagaila waf opalef apilifi sagafi'i, ukup asasipi pafe' talala' paila hiahaom amamba opalef apilifi fagafagailami. Apa' epes ami safe' sagaila Ambal bu'unai Godii, ukup asasipi pafe' talala' paila hiahaom okom Ambal bu'winai naga'iami atom. *

⁶ I'i ukup epes isimbai pepoma hiahaom awami ma nelelemb apimi asasimi atom, amamba mawalapai ga' higiligalalani. Apa' epen ami nomonas ananisi sisihis sogapoma hiahawes Spirit Ambal Godi, epen inimba dei' nape ambal namili opaf fape awanef. *

⁷ Epes mamahisa ukup pigaila waf opalef apimii, isimba sataga bousi Godi. Dei' main, esis ina sape lafela mu'uli hiani Godi, owa'. Ina banagesa sigaila mu'uli inimba, owa'atin. ⁸ Epes mamahisa sagape lafela waf opalef apilifii, epes isimba ina la'ifisa sonda' waf God okom maga'iafi, owa'atin.

* ⁹ Apa' i'i endilisi Ambal bu'unai Godi nupaipa, ipa' ina ata' pape lafela waf afamba apifi awafi ma nembel apinai, owa'. Ipa' pape lafela waf Ambal bu'unai. Apa' epen ami Spirit Ambal Kraisi owa' nope anina, inimba ina epen Kraisi, owa'.

* ¹⁰ Waf awafi faha alop ipe'ipi ma atiasi pogaga'. Apa' i'i Kraisi nogape nomona ipa', Ambal ananinai nonda'epa pepe namipa. ¹¹ Fowa' God nasa'ma Jisas notanima nosafel wandof. Ea' Ambal ananinai natopalopepa na'amba. Ipa'

* **8:5:** Ro 6:21 * **8:6:** Mt 12:34; Jo 8:43, 12:39; Je 4:4 * **8:8:**

1 Ko 3:16, 12:3 * **8:9:** Ga 2:20; Ef 3:17; 1 Pi 4:6

epes mamahipama Ambal bu'unai Godi nupaipa nomon, dao' a' nese'epa ambal namili alop ipe'ipi wapani. Ipa' pagaga' ea'i apa' owa', dei' anen nanda'epa pape namipa.

Ambal bu'unai Godi nanda'apa mataga awasi ananipai

¹² Ipa' alipipai ma wambota Kraisi, anif basef fagi'ma ifimba fa'i Kraisi natalepa ma maol lu'wani dei' apa' anof wiaf ata' fotoamapa ma mugaila okom Ambal bu'unai Godi. Apa' wiaf akapa ma mofe' mugaila opaf anamba apinai, owa'. * ¹³ I'i ipa' pefe' pigaila waf afamba opaf apinaima, anaf apega'. Apa' i'i ipa' peha waf awafi ipe'ifi fega' ma banagami Ambal bu'unai Godi, dao' anaf apepe namipa. ¹⁴ Epes ami sagaila wafa Ambal bu'unai Godi, isimba dei' sape awasi Godi wambota ananisi. * ¹⁵ Dei' main, ipa' ina pefa' Ambal bu'unai Godi nahapilipa sisihipa si'i sanda' kalabusi ma ata' ombel mogahepa wapani, owa'atin. Ipa' apefa' Ambal bu'unai anamba nanda'epa pataga awasi Godi. Banagami Ambal bu'unai atom dei' mofalana ma'i, "Ahamapa! Ahamapa!" * ¹⁶ Ambal bu'unai Godi atona nape sisihina apa' natopalopa ambagof ape'igufi ea' dei' mawalapa basef ma'if alihif, mape awasi Godi. * ¹⁷ Apa' magape awasi Godii. Ea' anaf mofa' hiahaom Ahamapai moloma hiahaom anen nambe'ama Kraisi nugu-mafiami, mofa'am moloma Kraisi. I'i dei' apa'

* **8:12:** Ga 6:8; Kl 3:5 * **8:14:** 2 Ti 1:7; Mk 14:36 * **8:15:** 2 Ko 1:22 * **8:16:** Ga 4:5-7; Re 21:7

mofa' akafimi mogalomanama, anaf mofa' poe bu'wani endilisi nonda'apa mogala' molomana.*

Anaf apa' mofa' poe bu'wani endilisi mogala' moloma Krai

¹⁸ Ae' okom ma'i poe inimba bu'wani anaf netaga nendawalapa apa' gani heveni, inimba anaf nikila'am endilisi akafimi amamba apa' dei' mogofa'am nogota ata'i. * ¹⁹ Hiahawes hiasi lu'wis sa'wis God nanda'asi saloma apa' epes wapani masa'ma balagah naep do' endilisi ea' mape masasa nogota ape'itai ma awasi Godi anaf sotaga sondawalap alihis. * ²⁰ Dei' hiahawes isimba lu'wis sa'wis saloma apa' epes ata' mape wafipa dowaf, maol akapa. Ina apa' atepa mola ukup manda'am mape, owa'atin. God atona nala'ambemapa mape lafela anen mape masasa hiahaom lu'wami anaf na'i nonda'ama ape'i. * ²¹ Dei' hiahaom awami amamba hi-ami mowa' hiahawes God nanda'asi salomapa epes mawasi'apa manda'apa awepa folo'walapa. Apa' anaf God notofa hiahaom amamba awami ea' mofa' mogogala'i mupe wahifipa andeande', amamba God nandandepam magapoma wamb-ota ananisii.

²² Apa' mogawa hiahawes hiasi lu'wis sa'wis God nanda'asi same' akafimi si'i nemata'w kwa'i kogola awani. Ea' hiahawes isimbai salef kwapete' sape safi'i sataga dei'. * ²³ Apa' ina hiahawes isimba atis, owa'atin. Fa'i apa' epes ananipai wapani, God okom ma'i anaf owagama

* **8:17:** Ro 5:2; 2 Ko 4:17 * **8:18:** Kl 3:4 * **8:19:** Jen 3:17-19

* **8:20:** 2 Pi 3:13; 1 Jo 3:2 * **8:22:** 2 Ko 5:2-4; Ga 5:5

notopalopapa ma mogape andeande'. Ea' dei' anen nali' naso'apa Ambal bu'unai ananinai. Ambal anamba naso'apana dowafi si'i presen. Ea' apa' wapani mame' akafimi kilef mape mohafa anef nemaf God notalepa ma mogataga si'i awasi ananipai, ma nemaf afamba nogaso'apa alop dambaipi namupi. * 24 God nowambe-lapa dei' mahapifana mape mohafana nonda'apa mogataga endilisi dindi'i dondo' ma hiahaom amamba fasimi. Apa' hiahaom mape mogohafami ma magatolom ea'i, apa' ina ata' mope mohafam wapani, owa'. Apa' i'i anin epen nigati hiahawes isimba nape negehafasi ea', dei' maina ata' nepe negehafas wapani? Owa'atin. 25 Apa' hiahawes apa' ata' owa' mugatilisia apa' mogawa endilisi anaf mogofa'asi, na'amba apa' ukup bamagep papoma isimba ea' mape mahafas.*

26-27 Ea' Ambal bu'unai Godi wapani nafi'i natopalopa apa' owa' banagipaia, nowa' banaga ukup ape'ipi. Nemaf mamahefa apa' ukup owa' bamagepa mogawa basef ifimba mogahali'anaefia, Ambal ananinai nandabeten natopalopapa. Anen nandabeten, apa' anen ina na'i nandabeten nahali'ana ma anif basef, owa'. Nanda' e waa atin nandabeten. Ea' God, nogawa ukup epesi hi'alep, nogawa okom Ambal ananinai wapani. Dei' main, nemaf afamba Ambal ananinai nandabeten na'amba, anen naila okom Godi nandabetena apa' epes ananipai.*

28 Hiahaom mamahoma ma'i mogatagamapai,

* 8:23: 2 Ko 5:7 * 8:25: Sam 139:1; 1 Ko 4:5 * 8:26-27: Ef 1:11

bu'wami awami hiami, God nanda'am manda' maol atina mogatopalopa apa' epes ukup pagapagaila anini. Apa' epes isimba nogofalas ea'i ma sonda' maol sigaila okom ananimii. *
 29 Dei' main, epes isimba God fowa' nogogawas ea'i nosaho'asa sotaga sondati na'amba atin si'i Nogamana ananinai ma anen notaga nogape si'i sahomas dembinai ma esis sahin owan wambota ananisi. 30 Epes isimba fowa' nogosaho'as ea'i, anen nofalas wapani. Ea' isimba nogofalas ea'i, anen na'i esis epes usi'isi ma naep ananipi ea' naso'as banagami mogogala'i ananiami ma anaf sondati si'i anen.*

God okom maimailapa ina nokwahepa, owa'

31 Apa' mame' basefa hiahaom amamba bu'wami God nanda'mapami dei' muwatanif mi'imama? I'i God nogatopalopapa, dei' anaf ina anis la'ifisa sogohambombagapa, owa'atin endilisi. * 32 Anen ina ombal mahanama nagaso'apai Nogamana ananinai, owa'atin. Anen nasapa'anai nafi'i ma nogatopalopa apa' hiapai. Na'amba dei' isimba endilisi atis anaf anen nogaso'apai anom hiahaom hiami wapani dowaf mugalumai anini. * 33 Apa' epes nogosaho'apa ea'i, anaf epen ami ni'i apa' epes aupai manda' waf awafii? Owa'atin. God atona na'i apa' epes usi'ipai. * 34 Anaf ina anis epes sofalapa si'i apa' epes aupai ma God nogagwamapa waf awafi ape'ifi, owa'atin. Dei' main, Krai Jisas

* 8:28: Kl 1:18; Hi 1:6 * 8:30: Sam 118:6 * 8:31: Jo 3:16

* 8:32: Ais 50:8 * 8:33: Sam 110:1; Ap 7:55-56; 1 Jo 2:1

naga' notanima nosafel wapani. Ea' anen nape wa'ol lagol kwahisigili Godi banagagoma ea' nandabetena nagatopalopapa wapani.

³⁵ Anaf maim da'im melefatapa ma mogak-waha okom Kraisi magamagailapai? I'i nimanimi mogatagamapa ma mogofa' akafimi ma nolomohapa klos luwaguf mais akapa a anis sohapa sonda'apa awepa ma i'i hiahaom awami mi'i mogahambombagapa, ma anis sohapa mogaga', anaf hiahaom amambai melefatapa ma okom Kraisi magamagailapai? Owa'atin endilisi. *

³⁶ Endilisi, hiahaom na'ambaimi motagamapa si'i Baibel na'iam naga'i,

“Apa' mape amam nematawa inel'ipai, isimba atis dei' nimaguf hiafi sa'i sohapa moga'. Satelepa si'i sipsipa sa'i sohapa mondaga' atin.”*

³⁷ Apa' hiahaom amambai hapaimi. Krai anen okom maimailapa a'owa' ea' dondol nowa' banagapa nanda'apa mikila' hiahaom amambai endilisi. ³⁸ Aho' ae' egawa endilisi, ina anom maefah la'ifima anaf melefatapa ma okom lu'unai Godi, owa'atin. Nema' mamahefa apa' moga' a'a moga'pe, anen okom maimailapa atapim. Amom en-sel maloma banagami awami mamimami mape mugumafi itapi, opa'wal, ma'akw, naoh, ambagof awami mamimami wapani a hiahaom dei' magapani a anom anaf migi' mogatagai, banagami mamimami ³⁹ a hiahaom banagami awami moga'pe ilifi itap awini a anom hiahaom migi' moga'fi'i, hiahaom amamba hiami ina anaf la'ifima

* **8:35:** Sam 44:22; 2 Ko 4:11 * **8:36:** Jo 16:33

megelefata apa'ma okom lu'unai Godi, owa'atin endilisi. Anen okom maimailapa atapina nihimba'mapa amamba ma Kraisi Jisas Dembinai ape'inai.

9

Pol okom iwanim endilisi ma esis Israel

¹ Basef ifimba ae' aga'iefi endilisi, ae' aman Kraisi ea' ina ambaso'am, owa'. Ambal bu'unai Godi nihimba'me nalome umafi malogol gagape opaf ae' nomoni nihimba'me na'ipi aga'i basef endilisifi atifi. ² Basef ifimba na'amba. Opaf ae'afi nimanif endilisi ea' okom mandanda' mafe' aom dondol. * ³ Ae' okom ma'ij a'owa' ma a'ij God nowambilai esis alipisi esimbel atembel ae'asi Israel sotanimai. Ea' ilij ano'w ufiaw na'ambaiaij, ae' endabetena Kraisa ae' lamene egaho'ofa esis sogafe' wambel bu'wambili heven, apa' ae' owa'atin. * ⁴ Apa' Israel God nandan-depapa ea'ij, nanda'apa mataga awasi ananipai ea' na'ij aho'ma mogati mogogala'ij banagami ananiji. Anen nala'ij lapa basef ananiji nalomapa ea' naso'apa mu'ulij bu'wani ananiji naloma waf endilisifi monda' lotumafi. Apa' mofa' basef ifimba God naga'ij endilisi atisafi. * ⁵ Bafapapa akupapa dembami ape'ijij mamumba magali'ij amamba ape'ijij atom. Ea' esimbel ape'ijij beli atembel Kraisi nataga epen, anen God nandan-depana nasapa'ana nagafi'ijij, nape nali'ma epes saloma hiahaom hiami numafiam. Anen God

* **9:2:** Eks 32:32 * **9:3:** Eks 4:22; Diu 7:6, 14:1-2 * **9:4:** Mt 1:1-16; Jo 1:1; Ro 1:25

endilisinai ea' mondasa'ma agol ananigili dondol liflafi. Endilisi.*

God nandandepa esis amam nematawa ananisi

⁶ Apa' basef ifimba God nagala' lapafi ina hig-iligalef dowafi, owa'atin. Epes sagataga mini'ap Israeli, hiasi ina a' Israel atis endilisi God nandandepas ananisi ea'i, owa'. * ⁷ Ea' apa' ina a' mi'iam na'amba mi'i, “Esis sataga esimbel Abrahami ea' esis hiasi a sape bawawis endilisi ananisi,” owa'atin.

Fowa' gani God naga'ipana na'amba na'i, “Esis esimbel Aisaki atis owagama sofa' agol wambota ine'isi.”*

⁸ Isimba na'amba. Anis bawawis Abrahami ina awasi Godi, owa'atin. Isimba sagataga basef ifimba God nala' lapef nagaso' Abrahamafi atis, agol gatomas ea' bafasana Abrahami endilisi. *

⁹ Lapa basef ifimba faga'i na'amba fa'i, “Nemaf afamba andandepaf ea'i, bola itanimai ea' Sera kola awani aman.”*

¹⁰ Ea' ina isimba atis, owa'. Nogaopa'w biam Rebekai ahamam atotona ea' Aisak atona bafamapa ape'inai. * ¹¹⁻¹² Apa' God okom mandanda' ea' ma waf nandandepa epesafi. Anen ina okom mandanda'ma maol epes sanda'ani ea' nosaho'as, owa'atin. Nogaopa'w amamba biam ata' mape nomona nembel akwa'umbili God na'ipa'w na'i, “Nogali'i dembinai a' nope lafela aonama nogagi'i. Sahomana anaf nonda'mana maol owamana.”

* **9:5:** Nam 23:19; Ro 2:28 * **9:6:** Jen 21:12 * **9:7:** Ga 4:23

* **9:8:** Jen 18:14 * **9:9:** Jen 25:21 * **9:10:** Jen 25:23

God naila okom ananimit atom dei' na'ipa'w na'amba. Anen ina okom ma'i anin maol bu'wani awani amom anaf monda'ani, owa'atin. Anen naila okom ananimit atom na'i basef na'amba. *
 13 Amamba si'i Baibel naga'i, "Ae' okom maimaila Jekop, apa' Iso andaiwa'mana endilisi."

14 Ea' apa' dei' ata' mi'i main? Mi'i, "God nanda' waf owa' andeande'a?" Owa'atin endilisi!*

15 Anen na'ipa Moses na'i, "Endilisi, anaf ae' i'i uwahipigama epen mamahina iga'i uwahipigamani ea' etopalopa epen mamahina ae' okom ma'i igatopalopani."*

16 Apa' ina mi'i ukup epesi atip paloma maol epesi atin sanda' God natopalopapa, owa'atin. God atona nati apa' uwahipipa dei' okom ananimit atom natopalopapa dowaf. * 17 Ea' Baibel na'i God na'ipa dembinai king Fero na'amba na'i, "Ae' a'i ihimba'masa banagami ae'ami epes hias ma anaf sogawalapa agol ae'agili sig'aigol itap hiagoma. Isimba atis dei' afelena nanda' hiahawes isimba."*

18 Apa' mogawa i'i God ni'i nogatopalopa anin epen dowaf, dao' anen notopalopan. Apa' i'i nogasopama opaf anin epenima, dao' nosopamanaf.

Okom wandafunai Godi naloma uwahipimi ananimit

* 9:11-12: Mal 1:2-3 * 9:14: Eks 33:19 * 9:15: Ef 2:8

* 9:16: Eks 9:16 * 9:17: Eks 4:21, 9:12; Eks 14:4

19 Apa' ina' atiasi ni'ipa ae' na'amba ni'i, "I'i na'ambama, dao' dei' maina God ata' naga'iam atin naga'i epen kofagema mapomana waf awafi anin nanda'afi? Ami la'ifina negapa'aga okom banagami Godi mogohafili? Owa'atin."*

20 Apa' epen, ina' mamahinama ma ni'i nig-inifala God? Owa'atin. A'i malep sanda' nombol sagala'api la'ifipa piginifala aman anamba nanda'ap nagala'api piga'i, "Dei' maina ina' nanda'e na'ambae?" Owa'atin. * 21 Aman nagala' malihi nofa'i anep itap nala' maloh biahap, anep maol bu'wanipi, anep falafalafipi maol awaniapi. Endilisi isimba andeande'.

22 God wapani nanda'am na'amba atin si'i aman nagala' malihi. Fowa' nanda' epes sataga ea' naila okom ananiami atom na'i aho'ma anis epes sogafe' ufia'w higiligalasa'wi. Esis safe' ufia'w akwamba, apa' anen ina nagwamasas waf awafi esis sanda'afi ulal, owa'. Anen ata' nanimbelis nape nasasas nogota laota ma anaf nogahambombagas. Dei' main, anen na'i nowalapa okom numbutinai ananinai notaga alihina noloma banagami ananiami ma epes hiasi sogogawam. * 23 Anen na'i nowalapam motaga alihim hiahaom mogogala'i fasimi ananiami ma anis epes anen nagati uwahipisi sogogawam. Epes isimba anen naila okom ananiami atom fowa' nandandepasa nogaso'asa mogogala'i esis. 24 Amamba ea' ma'i apa' atepa. Anen nofalapa ea'. Ina nofala anis Juda atis, owa'atin. Nofala

* 9:19: Ais 29:16, 45:9 * 9:20: Jer 18:6 * 9:22: Ro 8:29; Ef 1:3-12

anis owa' Judaisia wapani. * 25 Basef anona aman profet Hosea fowa' nanda'afi wapani faga'i na'amba fa'i,

“Esis amam nematawa isimba fowa' ina epes ae'asi, anaf i'i esis epes ae'asi, ea' epes isimba fowa' ae' owa' okom mogailasia egaso'asa opafia, anaf okom mimilas. *

26 Ea' wambel ali' a'ipas aga'i, 'Ipa' ina epes ae'ipai', anaf wambel ambalemba atembel sofalas si'i, 'Esis awasi Godi nagape namunai.' ”*

27 Fowa' profet Aisaia nondola'waifa esis Israel na'amba na'i,

“I'i esis Israel sotaga hias a'owa' si'i ko'onaga gaga'oh naoh akata ai, ea' hapaisi. Anaf Dembinai nofa'ai kwasala'wis dowaf nokwahomas waf awafi sotanimai. 28 Anen nonda' basefa kot hi'ilif notopa'ef kwafalis nogwamasa akafimi epes hiasi itapasi hi'ilas.”*

29 Ea' na'amba atin si'i fowa' Aisaia na'ias naga'i,

“I'i Dembinai banagonai nugumafi hiahaom hiamii owa' nosopama akafimi epes isimba sagape itap apa'ii ai, anaf apa' motaga lamonapa si'i walemb ambalemba bialemb Sodom Gomora. Apa' owa', owa'atin. Nasopamam ea'.”*

Esis Israel sanda' maola sogofa' waf usi'ifi

* 9:24: Hos 2:23 * 9:25: Hos 1:10 * 9:26: Ais 10:22-23

* 9:28: Ais 1:9 * 9:29: Ro 10:20

³⁰ Dei' apa' ata' mi'ias mi'imama? Apa' mi'ias na'amba mi'i, “Esis owa' Judaisia ina sanda' maol noma'wini ma sogofa' waf usi'ifi, esis sofa' waf afamba ea'. Esis sahapifa God sofa' waf afamba usi'ifi. * ³¹ Apa' esis Israel sanda' numa'umi ma sagaila mu'uli God nagaso' Mosesani ma sogofa' waf afamba usi'ifi, owa' esis ina sofa'af, owa'atin.”*

³² Dei' main, esis sandaiwa'ma sohapifana sogofa' waf usi'ifi. Esis ukup pandanda' pa'i sonda' maol atin sofa'af. Owa' asendesambaola anom otam sowa. * ³³ Amamba si'i Baibel naga'i, “Peme! Ae' ambe' anom otam wambel lu'wambili esis Israeli agol Saion. Otam amamba banagami motawa mogahambombaga epes sendesambaola sogowa. Apa' epen ami nigahapifa aman anambai, anaf anin ina okom iwanim, owa'atin. Nepe sonohan.”

10

Israel ina sofa' waf usi'ifi Godi, owa'

¹ Alipipai, okom ae'ami ma'ias a'owa' and-abetena anaf God nofa' esis Israel nokwahomas waf awafi sogotanimai. ² Ae' egawa esis andeande' ea' a'i isimba. Esis ukup pehafel a'owa' sanda' maol banagani ma sagaila God, apa' owa' esis ina sogawa basef Godi endilisifi andeande', owa'atin. * ³⁻⁴ Esis ukup mahamahasa waf God nanda'afi ma noga'i apa' epes usi'ipai. Ea'

* **9:30:** Ro 10:2-3 * **9:31:** Ais 8:14 * **9:32:** Ais 28:16; 1 Pi 2:6; Ro 10:11 * **10:2:** Mt 5:17; Jo 3:18

sanda'am sandawalapa waf usi'ifi asasifi atefa sagaila mu'uli inimba God nagaso' Mosesani. Ea' esis ina safe' lafela Goda noga'i apa' epes usi'ipai, owa'atin. Apa' Kraisi nafi'i nataga ea'. Isimba atis dei' apa' ina ata' mape lafela mu'uli inimba, a' owa'atin. Anen nafi'i nandawalapa amam nematawa mamahisa sagahapifa anini ea' dei' God nofalas na'i esis amam nematawa bo'wes hilili'i.*

⁵ Waf afamba epen nagaila mu'uli inimba ma God naga'i anin usi'ini, Moses fowa' naga'ias na'amba na'i, "Epen ami nenda' waf afamba hiafi andeande' hi'igalafi, anaf anin nefa' ambal namili ma nigaila mu'uli inimba."*

⁶ Apa' waf epen nagahapifanai God na'i anin usi'ini, waf afamba faga'ias na'amba fa'i, "Ipa' owa'i ukup pendanda' ma nelelemb ipe'ilimbi pi'i, 'Anaf ami nefe' nelota heven?' nihali' Kraisi nigisila'i, owa'i.

⁷ "Ea' ipa' owa'i pi'ias na'amba pi'i, 'Anaf ami nefe' newala wambel epes sagaga'ii nihali' Kraisi notanimai.' Na'ambai wapani owa'i."

⁸ Apa' basef ifimba fa'i main? Ifimba faga'i na'amba fa'i, "Basef ifimba fape felefele'ma ipa', fape malogufi nelelemb ipe'isi."

Basef apa' magahapilafi mawalapef maga'iefi ifimba. ⁹ I'i ipa' pewalapa basef ifimba alihif pi'i Jisas anen Dembinai ma pihapifa God nelelemb ipe'ilimbi pi'i anen nasa'mana nogosafel matmat

* **10:3-4:** Ro 7:10; Ga 3:12 * **10:5:** Diu 30:12-14

wapani, bola God nofa'ai ipa' wapani pitanimai pepe andeande'. ¹⁰ Dei' main, apa' mahapilif nelelemb ape'ilimbi God na'i apa' amam nematawa magataga be'epa hilili' ea'i. Ea' mawalapa hapif malogof ape'igufi God nofa'apa nokwahomapa waf awafi mutanimai mape andeande'.*

¹¹ Amamba si'i Baibel naga'i,
 “Epen mamahina nagahapifa anini, anaf epen inimba ina okom iwanim, owa'atin.”*

¹² Esis Juda saloma isimba owa' Judaisia ea' na'amba atin, God anen Dembinai atotona apa' hiapaii. Ea' anen natopalopapa naso'apa waf bu'wafi dowafa epes isimba mamahisa sogofala anini, * ¹³ si'i Baibel naga'i,

“Epes mamahisa soga'i agol Dembinai ma sogofala anini, atiasi nofa'as nokwahomas waf awafi sotanimai.”

¹⁴ Apa' i'i esis owa' sohapifanaia atiasi sofalana sogawana si'i mama? Ea' esis i'i owa' seme' basefanaea, atiasi sohapifana si'imama? Ea' i'i anin epen owa' ni'ipasa basef esisa, dei' esis sogawef si'imama? Owa'atin endilisi. * ¹⁵ I'i God owa' nosapa'i amam amambaia, dei' atiasi amom mefe' mowalapef mi'imama? Owa'atin. Si'i Baibel naga'i na'amba na'i,

“Awasi! Maol inimba epes sofa'i basef bu'wafi ae'afi sogafi'ii, inimba fasini endilisi a'owa'!”*

* **10:10:** Ro 9:33 * **10:11:** Ap 15:9 * **10:12:** Joe 2:32

* **10:14:** Ais 52:7 * **10:15:** Ais 53:1; Jo 12:38

Esis Israel ina saila basef bu'wafi Godi, owa'atin

¹⁶ Apa' ina Israel hiasi saila basef ifimba bu'wafi Godi, owa'atin. Fowa' profet anamba Aisaia naga'i na'amba na'i,

“Dembina, anaf ami nihapila basef ifimba esis sogame'efa afa'i? Owa'atin.”*

¹⁷ Ea' apa' mogawa, apa' hiapai mame' basef bu'wafi ea' ifimba atif fasa'mai hapif ape'ini. Ea' dei' basef ifimba fataga ufa'w mai'w? Ifimba fataga amom magawalapa basef Kraisi atom. *

¹⁸ Apa' ae' a'ias na'amba. A'i esis ina same' basef ifimba bu'wafi? Owa'atin. Esis same'ef ea', si'i Baibel naga'i,

“Basef fafe' fandahama walemb hielimbi fafe'agon hi'alagon.”*

¹⁹ Ae' etambel a'ias. A'i esis Israel sogawa basef ifimba a'a owa'? Owa'atin. Sogawa ea'. Moses nali' naga'i basef ifimba na'i,

“God na'i, ‘Ae' efa' anis amam nematawa falafisi, esis ina epes banagasi anep mini'ap endil-isipi, owa'. Ae' ifa'asi etopalopas falafis anaf ipa' kowolepama waf bu'wafi ae' enda'masaf esisi. Ae' ifa'ai epes isimba owa' sogogawaia ea' anaf ipa' pinifalis penda' megahohas.’”*

²⁰ Apa' Aisaia ina ombal mahana ma na'iam nagawalapam, owa'atin. Anen nawalapam na'iam alihim na'amba na'i,

* **10:16:** Jo 17:20 * **10:17:** Sam 19:4 * **10:18:** Diu 32:21

* **10:19:** Ais 65:1

“Epes isimba owa' sogolaoma ae'ia, dei' satolowe ea'. Epes isimba owa' sogahali'asa ae'ia, dei' ataga andawalapa esis.”*

²¹ Apa' esis Israel ina na'ipas na'amba, owa'atin. Anen na'ipas anif daif na'i,

“God na'i, ‘Epes isimba sanda' du'wanigai sogosambala basefi. Nogota lautai a'owa' ae' efalas anda' lagof iwaulasi. Owa', owa'atin.’”

11

God natopalopa Israel mini'ap du'wanis atis

¹ Dei' a'i ihali'ipa, God a' nali'amonas Israel hiasi mini'ap ananisi? Owa'atin endilisi! Ae' wapani Israeliwai esimbel Abrahami, wambota Benjamini.* ² Mini'ap isimba Godi anen fowa' nandandepas ea'i, ina nali'amonas, owa'. Ipa' pegawa basef Elaijai fagail Baibeli. Elaija nandabeten nanda' kotima esis Israela God, naga'i na'amba na'i,*

³ “Dembina, esis saha amom profet maga'. Ea' sugulata belitagw ine'igwi sondolaliminama. Ea' ae' atowe ata' atapiwi ape profet anda' maola ina'. Dei' esis salasolaome ma sehe egaga'.”*

⁴ Apa' God nagwamana basef maif Elaija? Anen na'ipana na'i,

* **10:20:** Ais 65:2 * **11:1:** 1 Sml 12:22; Sam 94:14; Fl 3:5

* **11:2:** 2 Kin 19:10,14 * **11:3:** 1 Kin 19:18

“Ae' ifa'ai epes hiasi 7,000-pelais ae'asi, isimba ina sanda' lotuma god baso'amunai Baal, owa'.”*

⁵ Isimba ea' na'amba atin si'i dei' wapani esis mini'ap du'wanis sape, God fowa' natilis uwahipis natopalopas dowaf. Isimba atis dei' nosaho'asa sagape epes ananisi si'is. * ⁶ Anen nati uwahipis natopalopas dowaf nosaho'as. Anen ina okom mandanda'ma anin maol bu'wani esis sanda'ani nosaho'as, owa'atin. I'i esis sonda' maol bu'wani ma God nosaho'asai, anen ina a' niti uwahipis maol bu'wani ma God nosaho'asai, anen ina a' niti uwahipis notopalopas dowaf nosaho'as, owa'atin. I'i na'ambaiai, waf afamba nagati uwahipisafi, afamba falafifi atef, owa' endilisifia.*

⁷ Dei' apa' ata' mi'ias mi'imama? Waf afamba God niti epes niga'i be'es hilili'i, afamba esis Israel sanda' numa'umi ma sa'i sogofa'afi, apa' ina sofa'af, owa'. Fowa' God nosaho' esis du'wanis atis ea' isimba atis sofa'af. Apa' esis Israel hiasi opalef asasimi maso'as ea', * ⁸ si'i buk Baibel naga'i,

“God nanda' opalef asasilifi si'i saga'oh. Nanda' naep asasipi ina pati ea' esis ina same' basef kofagefa, owa'atin. Ea' sape na'amba atin safi'i sataga dei'.”*

⁹ Devit wapani na'i basef ifimba atifa waf opalef esis Israeli maso'as ea' na'i,
“Ae' a'i nemaf afamba esis sope soga' gwa'aisi

* **11:4:** Ro 9:27 * **11:5:** Ga 3:18 * **11:6:** Ro 9:31 * **11:7:** Diu 29:4; Ais 29:10 * **11:8:** Sam 69:22-23; Sam 35:8

lu'wasi atin, God nowasi'asa nogagwamasa
 waf awafi esis sanda'afi si'i mandelef sandolam
 mail alialefa
 mogowa' mafis, ea' si'i isalefi waiwa sanda'am
 magapoma mafisi.

¹⁰ “Ae' a'i naep asasipi petaga walufipa ina
 atiasi siti. Ea' ina' awi nenda' nimanimi akafimi
 mindiwa alafugah asasigahi ma atapis
 sogape na'amba atin.”*

*Atiasi God nofa'ai esis owa' Judaisia sotanimai
 wapani*

¹¹ Dei' ae' ahali'ipa. Esis Juda sendesambaol
 sowa lamonas? Owa'atin endilisi! Esis sololama
 ufia'w sanda' waf awafi, isimba atis dei' God
 notanima nofa' anis epes sogololama Godi owa'
 Judaisia sotanima safe'ma anen. God nanda'as
 na'amba ma esis Juda ata' sigati waf afamba
 fasifi nanda'masaf esis sogololama anini ma anaf
 esis Juda kowogalasa waf afamba bu'wafi God
 nanda'masafi. ¹² Esis Juda sowa' alafugaha
 God, isimba atis dei' anen natopalopa amam
 nematawa hiasi itapasi sagape walemb hiagomai.
 Esis Juda sololama waf Godi, isimba atis dei'
 God natopalopa isimba owa' Judaisia nofa'as
 sotanimai sogape andeande'. Ea' nemaf afamba
 esis Juda hiasi hi'ilas dondo'ma ikwaf God okom
 maga'iefi sotanima sifi'mai anen, esis misi'ah
 hiasi owa' Judaisia, God notopalopas endilisi ma
 nofa'ai hiasi sogotanimai.

¹³ Dei' a'i ese'epa anif basef ipa' atipa owa'
 Judaipaia. God nasapa'e afe'ma anda' maola

* **11:10:** Ap 13:46; Ro 10:19

esis owa' Judaisia si'i ipa'. Ea' sonahema maol inimba bu'wani dei' anda'ani. ¹⁴ Maol inimba ae' okom ma'ian a'owa' ma egasa'ma esis Juda wambota ae'asi ma kowogalasa ipa' dei' pape andeande' pagaloma Godi. Ama ae' egefa' esis Juda du'wanis atis sotanima sogafe'ma God. ¹⁵ Aho', anen nowa' alafuga ma esis, isimba atis dei' nofa'ai anis epes itap hiagoma sataga nembel atembel salomana. Ama anef nemaf God noso'as nembela esis Juda sotanima sogafe'ma anen, no-topalopa epes hiasi itap hiagoma sotanima sope andeande' sondagala si'i sondagala ma anis epes saga' sotanima sogasafeli.*

¹⁶ Waf afamba esis Juda sotanima sogafe'ma God si'i basef waminif atini na'amba fa'i, i'i bret du'wanita tagali'i sanda'ata saso'anata Godi bo'ota hilili', ea' bret si'ita wapani Godi bo'ota hilili'i atota. I'i esis soso'ana nombalef lawagilif si'ilif God, dao' agufugama wapani Godi atoga.*

¹⁷ God nindiwaga nelefata anogof agof lawag oliviga sagawaga aofi ea' nofa'ai anogol agola anoga lawag oliviga alupugai nuwataniaga lawag agamba sagawaga aofi. Ipa' owa' Judaipaia, ipa' si'i agol lawag agamba alupugai. Isimba atis dei' ipa' pefa' hiahaom maim bu'wami mataga ma epes isimba Juda si'i agol lawag agamba alupugai gogofa' ifata nombalef lawag sagawaga aofi. *

¹⁸ Dei' ipa' owa' Judaipaia ina pi'i ipa' atipa bu'upai pikila' esis Juda si'i agof agwafomba God nigindiwagufi, owa'. Ipa' ina' pi'i ipa' bi'ipai esis epes awasi, owa'i. Dei' main, ipa' ina pegewa'

* **11:15:** Nam 15:17-21; Esi 44:30

* **11:16:** Ef 2:11-19

* **11:17:** Jo 4:22

banaga nombalifi, owa'. Nombalef atelef fewa' banagaipa. ¹⁹ A'i ipa' atiasi pi'ias na'amba pi'i, “God nindiwa agof agwafomba ma nogowatani apa' si'i anogol agol lawagigil.”*

²⁰ Dao' andeande', apa' esis Juda ina sahapi-fana, isimba atis dei' nahape'as. Apa' ipa' pahapifana dei' pape sisihpama anen. Apa' ipa' ipa' owa'i pesa'ma agof ipe'igufi pi'i ipa' atipa bu'upaia, owa'i. Ipa' ombal mondahepa solawaipa. ²¹ Fowa' God ina na'i aho'ma esis Juda si'i agof agwafomba lawag sagawaga aofi fape atapiguf, owa'. Ipa' solawaipa. Na'amba nonda'mepas na'amba atin si'i nanda' esis.*

²² Ea' ipa' ukup pendanda'mam andeande' okom biafim Godi uwahipimi wandafumi wapani. Epes sagakwaha waf ananifii, na'ipas dindinip. Apa' ipa' God naga'i uwahipipai, i'i ipa' pigaila uwahipimi amamba, dao' andeande'. Apa' i'i owa', anaf notopa'epa wapani. ²³ I'i esis Juda sokwaha waf awafi sogosambala Godafi, dao' atiasi nofa'as sotanimai si'i nogowatania agof agwafomba fowa' nigindiwagufi. Endilisi, God banagonai ma nonda'as na'amba. ²⁴ Ipa' pegawa fowa' ipa' ata' papani atin si'ipa lawag oliv alupugai, ea' God nanda' anin maol daiana ipa' natopa' anogol agola lawag agamba ea' nowataniaga anoga lawag oliv bu'ugai sagawaga aofi. God nanda' maol inimba. Ea' endilisi atis, anaf a' nofa' esis Juda sotanimai si'i agof nindiwagof lawag sagawaga aofi nuwataniagof fitanima fope

* **11:19:** Ro 12:16 * **11:21:** Jo 15:2,4; Hi 3:14

lawag afafugai si'iga. Maol inimba ina ahifina anen, owa'. Andipeni.*

God nati epes hiasi uwahipis natopalopas dowaf

²⁵ Alipipai, ae' andaiwa'ma ipa' ukup pegehema basef ifimba fowa' fandambahi'i dei' fandawalap alihif. Na'amba ipa' ukup pendanda' ma ipa' atipa pi'i, "Apa' mogogawai." Basef ifimba fowa' fandambahi'i na'amba. Esis Israel opalef asasilifi faso'as, apa' ina faso'as atapilif fape, owa'. Fefe' fefe' fendahama nogota atamba esis owa' Judaisia hiasi sifi'i sogafe'ma God dondo' ma ikwaf okom ananiami maga'iefi.

* ²⁶ I'i owa' main, esis Israel hiasi God nofa'as nokwahomasa waf awafi sotanima sifi'mai anen si'i Baibel na'ias naga'i,

"Anaf aman anamba nofa'as sogotanimai, nupani wambel Saion nifi'i notagwaha waf awafi esis wambota Jekopi, waf awafi sogosambala basef Godiefi. * ²⁷ Anef nemaf ekwaha waf hiafi awafi asasifi okom mose'eaf, i'ipasa basef agala' lapafi esis."

²⁸ Juda sosambala basef bu'wafi Godi, sataga bousi ananisi saha'ofa ipa' owa' Judaipaia nofa'epa pigatanimaii. Apa' God fowa' nosaho'as ea' okom maimailas. Dei' main, anen okom mapoma bafasam asasimi ma basef ifimba nala' lap nagalomamafi. ²⁹ I'i God nondandepa anin open noso'an presen fasini dowaf, anaf anen

* **11:24:** Ro 12:16; Lu 21:24; Jo 10:16 * **11:25:** Mt 23:39; Ais 59:20-21; Sam 14:7 * **11:26:** Ais 27:9; Jer 31:33-34

ina nosambala basef ifimba ni'ipan ni'i hapaifi noho'ofef, owa'atin. Basef ifimba atapif fepe.

³⁰ Fowa' ipa' owa' Judaipaia pesambala basef Godi. Ea' esis Juda wapani sosambala basef ifimba. Isimba atis dei' ipa' pefa' okom uwahipi-imi Godi. ³¹ Ea' na'amba atin dei' esis Juda wapani sosambala basef ama dei' sogofa' okom amamba uwahipimi Godi si'i ipa'. * ³² God nanda' epes hiasi hi'alas sogape lafela waf afamba sogosambala basefafi ma anen anaf niti esis hiasi uwahipis nogatopalopas dowaf.*

Apa' mondasa'ma agol Godi lu'wagol

³³ Awasi! Okom Godi naloma gawa ananini fasini lu'um a'owa' endilisi. Apa' epes ina la'ifipa endilisi ma mogogawa kofagema basef ananifi, okom hiami mogatambela, owa'atin. Apa' owa'atin endilisi ma mogawalapa basefa anen okom maga'iefi. Ea' apa' owa' mogawa waf hianai ananinaia, owa'atin.*

³⁴ Endilisi atis, si'i Baibel na'ias naga'i, “Ami negawa okom Dembinaii? Ami naso'ana nomonas anen? * ³⁵ Ami nali' naso'ana hiahawes anen ama atiasi nogagwamanas? Owa'atin endilisi.”*

³⁶ Anen nanda' hiahaom hiami hi'alam magape ilif itapi numafiam maloma epes. Ea' hiahaom amamba hiami maloma epes mape ma mogasa'ma agol ananigili atogol. Apa' epes hi-apai hi'ilapa mondasa'ma agol ananigili lifilafi dondol. Endilisi.

* **11:31:** Ga 3:22; 1 Ti 2:4 * **11:32:** Ais 55:8-9 * **11:33:** Ais 40:13; 1 Ko 2:16 * **11:34:** Jop 41:11 * **11:35:** 1 Ko 8:6

12

Apa' mondolali ma God mondaso'ana alop ape'ipi si'ip

¹ Alipipai, basef ifimba hiafi fagali'i endilisifi atif. Isimba atis dei' ahali'ipa dindinipa ipa' ukup pendanda'ma okom lu'unai Godi nagana-gaila ape'i nagati apa' uwahipipa. Ea' pindilali ma anen si'i fowa' saha mafis sagaso'ana pendaso'ana alop ipe'ipi si'ip hi'indalap. Alop ata' pope namop atapip pese'anap God atona hi'ilap ea' ananipi si'ip, si'i waf anen okom maga'iefi. Ipa' penda'as na'amba, penda' lotu endilisi ma God ukup ipe'ipi nomon. * ² Ipa' ina pepe pindati na'amba atin si'i sagaila waf itapafi, owa'i. Ipa' pi'i aho'ma God nonda' ukup ipe'ipi nomon petaga dambaipa waf ipe'ifi atiasi fegataga dambaif wapani. Ma bola pegegawa waf endilisifi God okom maga'iefi. Waf afambai bu'wafi usi'ifi.*

Apa' monda' maol mundaila gawa fasini God nagaso'apani

³ God natopalope dowaf, isimba atis dei' a'ipipa atona atin. Ipa' pegawa waf faloma gawa ipe'ini sandanda' sa'imama, apa' ipa' ina ukup pendanda' pi'i ipa' atipa fasipai endilisi, owa'i. Ipa' ata' pewaloga ipa' ukup pendanda' pefe' ande-ande' pendahama hapif ipe'ini God nagasi'ipani nafe' negetambel. * ⁴ Apa' mogawa alop ape'ipi

* **12:1:** Ef 4:23; Ef 5:10,17; Ro 6:11,13; 1 Pi 2:5; Jo 4:24 * **12:2:**
1 Ko 12:11; Ef 4:7 * **12:3:** 1 Ko 12:12

atotop, apa' sa'osa'opa hiapi. Ea' apamba hiapi ina panda' maol atifin, owa'atin. Panda'an daindai. * ⁵ Ea' na'amba atin apa' amam nematawa hiapai magape sisihipama Kraisi, apa' si'i alop atotop. Ea' apa' hiapai atona atin si'i mandatopalopa atin magaloma anop alop wa'awa'api hiapi. * ⁶ God natopalopapa dowaf naso'apa presen hiahaom fasimi ananiami maloma gawa naninani. I'i God nosa'ma okom anin epeni ma negawalapa anif basef, anin nendawalapef dondo' ma hapif ananini. ⁷ Epen mamahina negatopalopa esis sahin owani, anin nendanda' maol inimba endilisi negatopalopa alipisi. I'i epen gawaini ma nigihimba'mas si'itisi, anin nendanda'an endilisi nihimba'mas. * ⁸ Ea' epen ami negegawa ma negafela ukup esis epesi, dao' anin nendanda' maol inimba endilisi negasa'ma ukup asasipi. Epen negaso'an hiahawes anin alipinii, anin a' nendaso'an hias. Epen nigimafi anin maoli, okom ananiami mondohafel endilisi ma maol inimba. Epen nigati anin alipini uwahipini ma netopalopan nigimafiani, anin sonohan nendatopalopan.*

Waf endilisifi ma ukup pigapigaila esis sahin owan

⁹ Ipa' ukup pagapagaila esis sahin owan, dao' ipa' ukup pindailas endilisi. Ipa' ina pembmaso'am, owa'i. Ipa' pendewa' alafugah endilisi ma waf awafi, pendape sisihipa endilisi ma waf

* **12:4:** 1 Ko 12:27; Ef 4:25 * **12:5:** 1 Ko 12:4-11; 1 Pi 4:10-11

* **12:7:** 2 Ko 9:7 * **12:8:** 1 Ti 1:5; 1 Pi 1:22; Emo 5:15

bu'wafi. * 10 Ipa' pendaso'asa opalef esis sahin owan ukup pindailas endilisi. Ipa' hipai atona atin pendasa'ma agof isimba anis daindaiasi atis.

* 11 Ipa' pendanda' maol banagambel lifilafi ukup pehafel a'owa' penda' maol Dembinaii. *

12 Ipa' pepe pehafa Dembinai nogatopalopepa. Ea' pendagala atin hi'indalepa. I'i nimanimi mogatagamepa, pilutu banagepa. Ea' pendabeten nimaguf danda lifilafi. * 13 I'i amam nematawa Godi hiahawes akas, dao' petopalopas pese'as. I'i epes analemb walemb lauguni sifi'i sogatagamepa, dao' pimafias andeande'.

14 Epes sogahambombaga ipe'i, pendabeten pihali' Goda nofalo'mas sogataga andeande'. Aho', pendabetenena esis. Apa' ipa' ina pendabeten pihali'ana nonda' esis awes, owa'i. * 15 Esis epes sondagalai, ipa' sonehepa pendalomas. Ea' isimba sogalifi, pelef pelomas. * 16 Ipa' ukup pendapoma sahin owan ipe'isi hi'indalas pepan opalef atelef pendalomas, si'i ukup pagapoma ipa' atipa. Ipa' ina ukup pendanda'ma ipa' atipa pi'i dembipai, owa'i. Pefe' peloma epes isimba falafisi. Ipa' ina ukup pi'i ipa' atipa gawaipai, owa'i.*

17 I'i epes sonda' waf awafi ma ipe'i, ina pegwamasa waf awafi esis, owa'i. Ipa' ukup pendapoma waf bu'wafi ma naep epes hi-

* 12:9: 2 Pi 1:7; Fl 2:3 * 12:10: Ap 18:25; Re 3:15 * 12:11: 1 Te 5:17 * 12:12: Hi 13:2 * 12:13: Mt 5:44; Ap 7:60; 1 Ko 4:12 * 12:14: Sam 35:13 * 12:15: Ro 15:5, 11:20; Pro 3:7; Ais 5:21 * 12:16: 1 Te 5:15

asii penda'af. * 18 Ipa' ina ukup penda'danda'ma wandaf, owa'i. I'i ufa'w andepa'wai, ipa' pepe opalef atelef pelomas hi'indalas. *

19 Ipa' alipipai ae'ipai endilisi, ina pegwamasa waf aunai esis sanda'mepa anai, owa'i. Ipa' pindihi'amas sondafe'mago Goda okom wanda'funai nondanda' maola esis. Dei' main, basef fagail Baibeli fa'i,

“Waf gwaifi ma anis epes sanda' waf awafi, afamba maol ae'ani. Ae' atowe bola egwamasa waf afamba awafi ma esis.” Dembinai naga'i na'amba.*

20 Apa' ipa' penda'as si'i Baibel naga'i, “I'i bousi ipe'isi nolomohas, dao' pese'asa gwa'aisi esis. I'i iap pese'as, pese'asa embel. I'i ipa' penda'as na'amba, atiasi penda' esis ambagof awagofa waf awafi asasifi.” 21 Ea' dei' a'ipipa, ipa' ina pepe pititi waf awafi fikila' ipa', owa'i. Apa' pendanda' waf bu'wafi ma pegatalogofa waf afamba awafi.

13

Apa' mondape lafela amom gavman

1 Epes hiasi a' sondape lafela amom gavman. Apa' mogawa ina anona gavman nataga dowaf, owa'atin. Maol hiani gavmani nataga lagol Godi atogol. Ea' gavman amamba hiami magapani, God atona nanda'am mape.* 2 I'i epen

* 12:17: Mk 9:50; Hi 12:14 * 12:18: Diu 32:35; Mt 5:39; Ro 13:4;

1 Te 1:6-7; Hi 10:30 * 12:19: Pro 25:21-22; Mt 5:44 * 13:1: Ta 3:1; Pro 8:15; Jo 19:11

mamahina negesambala basef gavmani, anin nesambala waf Godi wapani. I'i epes ami sogosambala amambai, atiasi sofa' akafimi awami ma waf afamba esis sanda'afi. * ³ Amom gavman ina mapoma mugaumbela epes isimba sanda' waf fasifii, owa'. Amom mapoma mugaumbela epes isimba sanda' waf awafii. I'i ipa' pindaiwa'ma ombal mogahepama amom gavmana, dao' penda' waf bu'wafi atefa amom atiasi moganifela agof ipe'igufi. * ⁴ Gavman manda' maola Godi motopalopepa pegape andeande'. Apa' i'i ipa' penda' waf awafi, ipa' ombal mondahepamam. Ipa' pegawa bainat anamba magahapilanai, ina mahapilana dowaf, owa'. Manda' maol Godi ma mogogwa akafimi awami ma isimba sanda' waf awafii. ⁵ Na'amba dei' apa' a' mondape lafela amom. Apa' ina a' ombal mohapama akafimi amamba atom awami ea' mila basef amamifi, owa'. Apa' mundaila malogof fagape opalef ape'ilifi nomon monda'as na'amba.

⁶ Isimba atis dei' ipa' panda' tekis. Dei' main, amom gavman manda'mana maol Godi dondol banagem mumafi maol inimba atin. * ⁷ Ipa' maol inimba napomepa ma pegaso'am hiahawes sasisasi epes amamba, pendaso'am. Amom mogofa'asa tekisi, pese'ama tekis. Amom mogofa'asa moni maisa mogatala waf mu'uli gavmani, pese'am. Dembami mamahoma manda' maol bu'wani nandahama epes sogasa'ma agof amamugufi, dao' pendafe' lafela amom. Ipa'

* **13:2:** 1 Pi 2:13-14; 1 Pi 3:13
22:21

* **13:3:** Ro 12:19

* **13:6:** Mt

sonehepa ma pegasa'ma agofa anom amam, dao' pesa'ma agof amamugufi.*

Dei' si'i maina apa' magaila mu'uli Godi endilisi?

⁸ Ipa' ina pewaola anof wiafa moni mais fotaoma anin epen, owa'i. Apa' anof wiaf atotof fondotaomapa atapif. Wiaf afamba ukup ipel'ipi pigapigaila anis sahin owan hiasi. Dei' main, epen mamahina okom mogamogaila anin epen daiani, anin nagaila mu'uli inimba endilisi. ⁹ Apa' mogawa mu'uli inimba naga'ias na'amba na'i, "Ina' owa'i nehambombaga waf daso'amaifia ea' owa'i neha anis amam nematawa sog'a, owa'i nenda' wala, ea' ina a' kowolena ma hiahaom anis daindaiasi, owa'i."

Mu'uli inimba naloma anin mu'uli mamahina nagapani wapani, kofagena inimba atin naga'i na'amba na'i, "Ina' okom mimila anis epes daias na'amba atin si'i okom magapoma ina' atina."*

¹⁰ Epen ami okom maimaila anin epen daiana nagaso'an opaf anini, inimba ina nanda' waf awafi ma anin, owa'. Epen inimba okom magamagaila anin epen daiani, anin naila mu'uli inimba endilisi.*

Apa' mondafe' usi'tipa

¹¹ Ae' a'i ipa' penda' waf afambai. Dei' main, ipa' pegawa ea' nogota ata'e dei' magapautai. Nogota ata'e ipa' pekwaha koha pegesafel. Ipa' pegawa fowa' apa' mataga mahapifana

* **13:7:** Mt 22:39-40; Je 2:8 * **13:9:** 1 Ko 13:4-7 * **13:10:** Ef 5:14; 1 Te 5:6-7

dambaipa, nemaf afamba God na'i a' nowambe-lapa mogotanimai ata' fapani laogon, apa' dei' fataga felefele' kwasakwasala. * 12 Owamb ba'i a' hi'ilamb ea' felefele'ma lola negataga. Na'amba andeande'ma apa' mogakwaha waf hiafi awafi owambifi ma monda' waf usi'ifi alipifi fepe tatala'if si'i mofa' walitapa magahagasa wandafa waf awafi. * 13 Apa' mondafe' hilili' andeande' si'i epes sagape alipi. Ina mea' embel banag-imbeli mohagamogaol ea' gikal mo'oh mi'i basef wandafifi, owa'i. Apa' owa'i monda' waf so'a waulafia monda' salamala basef awafi alugufi. Apa' ina' monda' migimigah mopa' ea' kowolapa ma hiahaom anis epes daiasii, owa'i. * 14 Apa' dei' pefa' Dembinai Jisas Krai ea' pindawisana si'i klos amamba lu'wami sanda' wandafami pefa'ana pepomana. Ipa' ina ukup pelapefe' ma pigaila nomonas awami alop atonaimi, owa'i.

14

Apa' ina mowaloga fe' esis sahin owani, owa'i

¹ Epen mamahina nagahapifanai, hapif ananini owa' banagania, inimba ipa' pese'an nelelemb ipe'ilimbi pefa'an pifi'i piwisi amam nematawa Kristen. Apa' ina pi'i pifitap pelomana basef mamimami, owa'i. * ² Anin epen nahapifana banagen, na' gwa'aimi mamimami hiami. Apa' hapif anin epeni ina banagen, na'amba ina na' mafis maim, owa'. * ³ Ea'

* 13:11: 1 Jo 2:8; Ef 5:11, 6:11 * 13:12: Lu 21:34; Ef 5:18

* 13:13: Ga 3:27 * 14:1: Jen 1:29, 9:3; Ro 15:7 * 14:2: Kl 2:16

epen inimba naga' gwa'aimi mamimamii, ina okom iwanim mopoma epen inimba owa' nega' mafisia, owa'i. Ea' epen inimba owa' nega' mafisia ina okom iwanim mopoma epen inimba naga' gwa'aimi mamimamii nanda' waf awafi, owa'i. * ⁴ Ipa' ina pewaloga anin epen nanda' maola anin epen daiani, owa'i. I'i anin nigalutu banagena maol ananini o negewa, isimba maol anen Dembinai nugumafi anini atin. Anin atiasi nigalutu banagani. Dei' main, Dembinai ananinai atona la'ifinama nogowa' banaga anina nigalutu banagen.*

⁵ Anin epen okom mapoma anef nemaf lu'uf a'owa' fikila' anif nimaguf hiafi. Apa' anin daian na'i nimaguf hiafi na'ambaif atin. Epes isimba hiasi atona atin sondameme'ma ukup asasipi atip andeande'. ⁶ Epen mamahina okom magapoma anef nemaf be'ef a'owa'i, anin okom mandanda' ma Dembinai dei' nanda'am na'amba. Ea' epen inimba naga' gwa'aimi mamimamii, anin okom mandanda'ma Dembinai na'am. Dei' main, anin nanifela God na'as. Apa' epen inimba owa' nega' gwa'aimi mamimami hiamia, anin okom mapoma Dembinai, dei' nandaiwa'ma anis gwa'aisi. Inimba wapani nanifela God nihi'as.

⁷ Apa' mogawa la'afena apa' ina anin epen nape nanda' maol naila okom ananiami atom, owa'. Ea' ina anin epen naila okom ananiami atom naga', owa'atin. * ⁸ I'i apa' mope, dao' monda' maola mogasa'ma agol Dembinaii. I'i moga',

* **14:3:** Mt 7:1; Je 4:11-12 * **14:4:** Ga 4:10 * **14:7:** Lu 20:38; Ga 2:20; 1 Te 5:10

moga'ma mogasa'ma agol Dembinaii. Ea' i'i apa' mope namepa o moga', apa' Dembinaii atepa. ⁹ Ea' isimba atis Krais naga' notanima ambal lapaona nosafel wapani ma nagape Dembinai ma epes isimba sagaga'i saloma isimba ata' sagape namisi.*

¹⁰ Dei' maina ipa' pagawaloga sahin owan ipe'isi ma fe' asasini a paga'ipas basef iwanifi? Na'ambai owa'i. Ipa' pegawa anaf apa' hiapai hi'ilapa a' mulutu gani God nope nogowaloga epes hiasima ea' nowalogapa ma basef lu'wafi. *

¹¹ Amamba si'i Baibel na'iam naga'i, "Dembinai naga'iam na'amba na'i, 'Ae' a'i endilisi atis, anaf epes hiasi sindiwa nembawa sotawa sonda' lotuma ae' hi'ilas, ea' sowalapa basef alihif si'if si'i ae' God endilisiwai.' ”*

¹² Ea' apa' mogawa apa' hiapai atona atin anaf moga'ipa Goda waf hiafi kofagefa apa' manda'afi.

Apa' ina monda' anis hiahawes mohambom-baga sahin owan, owa'i

¹³ Ea' ipa' ina pewaloga sahin owan ipe'isi ma fe' asasini wapani, hapaimi. Apa' ukup pendanda' na'amba mi'i apa' ina monda' anef wafa monda' owamapa ape'inai nowa nonda' waf awafi, owa'i. * ¹⁴ Dembinai Jisas ea' nawalipi egawa isimba. Ina anom hiahaom gwa'aisi mafis mais awasim dowadowaf, owa'. Okom epeni atom mandanda'ma anis maefah alugwisi, dei'

* **14:9:** Mt 25:31-32; Ap 17:31; 2 Ko 5:10 * **14:10:** Ais 45:23; Fl 2:10-11 * **14:11:** Ga 6:5 * **14:13:** Ap 10:15; Ta 1:15

hiahawes isimba awes alugwis. * 15 I'i ina' nea' anis maefaha waf afamba ine'ifi fehambombaga okom owamenai, ina' negawa, waf afambai ina' owa' okom mimila owamena, owa'. Krais naga' ea' ma nogowambilai owamena anamba. Ea' ina' owa'i nehambombagana ma gwa'aisi ine'isia. * 16 Ipa' ina' penda' anef waf anis sahin owan Kristen sitilipa fenda' ukup asasipi iwanip, owa'i. I'i ipa' pi'i waf afamba bu'wafi, ipa' ina' penda'afa naep asasipi, hapaifi. 17 Waf afamba saga' gwa'aisi embelafi, afambai ina' kofagefa ma anamba God nagala'ambemagoma, owa'atin. Anamba waf usi'ifi hilili'i a opalef awanilifi faloma waf sonagahasafi atef fagapoma. Ambal bu'unai Godi naso'apai waf afambai. 18 Epen ami nape nanda' maola Kraisii ma owa' nenda' anef waf fenda' Kristen ukup iwanipia, atiasi God okom bo'oma waf ananifi ea' epes wapani sogawa anin epen bu'wani.*

19 Dei' apa' mundaila waf hiafi fenda' apa' mogape opalef atelifi, a waf usi'ifi hiafi fegewa' banaga hapif esis sahin owani. * 20 Ina' okom mopoma gwa'aisi atis ea' nehambombaga maol Godi, owa'i. Endilisi, hiahawes hiasi gwa'aisi bu'wasi. Apa' i'i ina' nea' anis maefaha sonda' anin epen newa nenda' waf awafi, dao' ina' wapani nanda' waf awafi. 21 Ina' andeande'ma nega' mafisi embel wain gwa'aisi mais, o nenda' anis maefah mamahisa sonda' owamena nogowa ma waf awafi, owa'i.

* 14:14: 1 Ko 8:11-13 * 14:15: Ta 2:5 * 14:18: Ro 12:18;

Ro 15:2 * 14:19: 1 Ko 8:13

²² Okom ine'imi atom mondanda' neloma Goda hiahawes isimba sonda' owamena nogowai. Epen okom mogapoma anis maefah bu'wasi, okom ananimiti ina manda' kotimana hiahawes gwa'aisi mais isimba, anin sonohan. * ²³ Apa' epen ami okom biafima nega'asa, kofagema ananimiti atom. Dei' main, okom ananimiti ina nahapilif banagen na'as, owa'. Hiahawes hiasi epes owa' sogahapifanaia sanda'ami, amamba awami.

15

Apa' mundaila okom Kraisi

¹ Apa' epes magahapifana banagambili, maol ape'ini inimba ma mogatopalopa epes isimba hapif owa' banaganita. Esis ina la'ifisa sogofa' nimanimiti asasimi, isimba apa' motopalopas mofa' nimanimiti asasimi. Apa' ina mila nomonas ape'imi atom, owa'i. * ² Apa' hiapai atona atin monda' maol mondatopalopa epes sagape felefele'ma ape'i ma atiasi sogofa' waf bu'wafi sogataga banages. * ³ Apa' mogawa Kraisi wapani ina sonahana okom ananimiti atom, owa'. Waf awafi fatagamana si'i Baibel na'iasa anen naga'i, "Epes sa'i basef findiwaefa ina' ea' basef ifimba atif fafi'i faso'ala ae'."*

⁴ Dei' main, basef hiafi fowa' amom manda'ef fagail Buki manda'efa fagawalipa apa'. Basef ifimba fegewa' banaga opalef ape'ilifi ma mugalutu banagepa mi'i endilisi atis God notopalopapa

* **14:22:** Ta 1:15

* **15:1:** Ro 14:19; 1 Ko 9:19; 1 Ko 10:24,33

* **15:2:** Sam 69:9

* **15:3:** Ro 4:23-24; 1 Ko 10:11

ma mogape andeande'. ⁵ Apa' mofa' banagami ma God atona nanda'apa malutu banagepa magahapifana. Ae' a'i anen notopalopepa pila waf Kraisi Jisasi endilisi pigahapila nomonas atifisi. ⁶ Ama ipa' pegape opalef atifilif a malogof atogof pegasa'ma agol Godi, anen ahama Dembinai ape'inai Jisasi Kraisi.*

Kraisi natopalopa esisi Juda saloma isimba owa' Judaisia wapani

⁷ Ea' ipa' hipai ukup pindaima atin pendaso'asa nelelemb esisi sahin owan si'i Kraisi wapani nago'asa nembel apa', ma epes hiasi sogasa'ma agol Godi lu'wagol. * ⁸ Ae' a'ipipa na'amba. Kraisi nafi'i nataga nanda' maol nape lafela natogopalopa esisi Juda. Anen nanda'as na'amba ma nigihimba'masa God naga'i basef endilisifi datimai. Basef fowa' nala' lapef nagaloma dembami bafapam akupam asasimi fandawalap alihif. * ⁹ Kraisi nanda' maol inimba ma nogatopalopa esisi sogololoma Godi owa' Judaisia wapani sogogawa God na'ias esisi uwahipisa sogasa'ma agol ananigili lu'wagol, si'i Baibel na'ias naga'i,

“Anaf ae' ewalapa basef i'i agol ine'igili ma anis epes daias sogololoma ine'i. Ea' ela analef awalef efela agol ine'igili.”*

¹⁰ Ea' anif basef Baibeli faga'ias na'amba wapani fa'i,

* **15:6:** Ro 14:1 * **15:7:** 15:24 * **15:8:** Ap 3:25; Ro 11:30; Sam 18:49 * **15:9:** Diu 32:43

“Ipa' epes pegelelama Godi, pendagala peloma esis wambota ananisi.”*

¹¹ Ea' anif du'wanif fa'i,
 “Ipa' hipai pegelelama Godi, pendasa'ma agol Dembinaii.

Pendasa'ma agol ananigili ma analef awalef.”*

¹² Ea' Aisaia wapani na'ias na'i,
 “Anaf anona aman notaga wambota Jesii.
 Aman anamba a' notaga nope Dembinai ma esis sogololama Godi numafias ea' sohapifana si'i endilisi atis anaf anen notopalopas.”

¹³ Apa' mogawa endilisi notopalopapa ma mogape andeande'. God anen kofagonama amamba. Dei' ae' a'i ipa' pihapifana nonda' dagala lu'wani neloma opalef awanilifi sogataga si'isa ipa'. Ea' a'i banagami Ambal bu'unai ananinai nonda'epa pegawa endilisi atis anaf piti banagami mogogala'i ananiami.

¹⁴ Ipa' alipipai ae'ipai, opaf ae'afi egawa endilisi ma ipa' panda' waf fasifi dondol ea' pegawa gawa hiani naninani. Ea' ipa' ila ma pegaso'as nomonas bu'wasi sahin owan. ¹⁵ Apa' anif basef anda'efa ipe'i ifimba banagafi a'owa' kwasakwasala. Apa' ae' ina ombal mahe andafa'mefa anda'ef, owa'. A'i esa'ma nomonas ipe'isi. Dei' main, God nati ae' uwahipiwi nase'e nembel ae' natopalope dowaf. * ¹⁶ Ea' anen nanda'e ape anda' maola Krai Jisasa enda' maol la'afena esis sogololama Godi owa' Judaisia. Anda' maol si'i amom mondolali ma Godi awalapa basef bu'wafi

* **15:10:** Sam 117:1 * **15:11:** Ais 11:10; Re 5:5 * **15:15:** Ro 1:5, 12:3; Ro 11:13; Fl 2:17

ananifi. Ae' a'li ifa'ai epes isimba sogololama Godi sifi'mai anen ea' Ambal bu'unai ananinai nonda'as sotaga epes Godi atis bo'wes hilili' egaso'anas anen si'i ofa anen okom maga'ian a'owa'i.

¹⁷ Ae' ape sisihiwi aloma Krai Jisas ea' sonahe ma maol inimba anda'ana Godi. *

¹⁸ Krai atona nase'e banagami anda' maol inimba. Anen natopalope nanda'e banagewe afe' anda' maol inimba bu'wani awalipa esis sogololama Godi ma silana sogame' basef ananifi. Ae' andaiwa'ma iga'ipipa anif basef daif, owa'.

Ifimba atif. ¹⁹ Ambal bu'unai Godi nanda' hiahaom banagami nowa' banagae ma anda' banagami mamimami. Epes hiasi sati banagami amamba ea' same' basef Godi sailif. Dambadamba anda'am Jerusalem awalapa basef bu'wafi ma Krai afe' lauguni hi'alagon itambili itap lu'upa Ilirikam. *

²⁰ Maol inimba ae' okom ma'ian a'owa' ma egawalapa basef ifimba bu'wafi anagon esis owa' ata' sogogawa Kraisia. Ae' andaiwa'ma igi' efe' ewalapef fegetoma anif anom mali' mafe' magawalapafi, owa'. * ²¹ Ae' okom ma'ias si'i basef faga'ias, "Esis epes owa' anis sefe' soga'ipasa basefa aninia, anaf seme'efa sotolona. Ea' epes isimba owa' sogame' basefanaia, anaf seme'efana sogawana."*

²² Fowa' anda' maol inimba agawalipasa basef Kraisi. Maol inimbai nahefa ufiaw ae'akwi nimaguf hiafi ea' ina afe'mago ipa', ata' owa'.

* **15:17:** 2 Ko 3:5 * **15:19:** 2 Ko 10:15-16 * **15:20:** Ais 52:15

* **15:21:** Ro 1:10-13

Pol na'i niti Rom ea' nefe' itap lu'upa Spen

²³ Apa' dei' ae' maol ake na'a'e. Afagof hiagufi ae' okom ma'i a'owa' ma egafe'mago ipa'. *

²⁴ Isimba atis dei' a'i ata' ili' efo'o iti ipa' ma main, efe' itap lu'upa Spen. Ea' a'i ata' ipani nogota laota kwasakwasala endagala elomepa ma main, dao' ipa' petopalope pilutumi pehapone ufia'w kwagafe' Speni.*

²⁵ Apa' dei' a'i efe' Jerusalem enda' maol etopalopa esis amam nematawa Godi. * ²⁶ Esis Kristen sagape Masedoniai saloma Kristen Griki sa'i basef sandame'maef ea' ma sogowala hiahawes asasisi sonda' du'wanis sefe' Jerusalem, sogaso' esis amam nematawa Godi hiahawes akasi. * ²⁷ Endilisi ukup asasipi atip pa'ias ea' dei' sanda'as na'amba. Apa' ae' a'i esis sowaolamasa wiaf fotaoma esis Kristen sagape Jerusalami. Fowa' esis Juda sali' soso'asa basef Godi ma sagatopalopa ambagof esis isimba sogololama Godi sagape Masedoniai Griki. Isimba atis dei' andeande'ma esis sogwamasa wiaf afamba esis Judia ma hiahawes sogatopalopa alopi. ²⁸ Ea' ae' a'i ata' enda' maol inimba hi'ilan nili'. A'i ata' ese'asa hiahawes isimba bu'wasi esis Jerusalem hi'ilas ama main, ila ufia'w Speni efo'o ma ata' ili' itilipa. * ²⁹ Ae' egawa ea' nemaf afamba egafe'mago ipa', atiasi hiahaom fasimi Kraisi a' mope si'ima ae' efo'o etagamepa.*

* **15:23:** 1 Ko 16:6 * **15:24:** Ap 19:21 * **15:25:** 1 Ko 16:1; 2 Ko 8:1; 2 Ko 9:2,12; Ap 24:17 * **15:26:** Ro 9:4; 1 Ko 9:11 * **15:28:** Ro 1:11 * **15:29:** 2 Ko 1:11; Kl 4:3; 2 Te 3:1

³⁰ Apa' mahapifa Dembinai ape'inai Jisas Krai, ea' mogawa Ambal bu'wali Godi nasa'ma ukup ape'ipi ma pigapigaila esis sahin owan ape'isi. Isimba atis dei' a'ipipa dindinip a'i nomonas isimbai sosa'ma ipa' penda' maol numa'wini pegaloma ae' ma beten. Ipa' pendanda' betena God notopalope ae' ³¹ nogatagwahowe ma lagof anis epes Judaisi owa' sogahapifanaia. Ipa' pendabetena God nonda' amam nematawa ananisi sagape Jerusalem sondagala ma maol inimba anda'ana agatopalopasani. ³² I'i God ni'i aho'me ai, efo'o etagamepa epe endagala a'owa' elomepa ata' epoma noma'w kwasakwasala. ³³ God anen kofagonama opaf awanafi. Ae' a'i anen nope nolomago ipa' hipai. Endilisi.

16

Pol na'ipasa nemaf bu'wafi amam nematawa hiasi

¹ Ae' a'ipipa ma pigimafi Fibi andeande', ako'w haniti'mafa afa'ikwi kwanda' maol kwatopalopa esis Kristen sagape Senkriai. ² Fibi kwape sisihi'wa Dembinai. Ea' ipa' pendaso' nelelemba ako'w si'i waf bu'wafi apa' amam nematawa Godi monda'afi. I'i ako'w nomonas nimanisa anis maefaha, ipa' pendatopalopa'w. Dei' main, ako'w kwatopalopa ae' wapani.*

³ Ipa' penda'mas nemaf bu'wafi Akila naloma waulu'mana Prisila ea' pi'ipaso dagala ae'ani. Esis bias apa' mandao'oma manda' maol atin Krai Jisasi. Fowa' esis sandandombol endilisi ma sagatopalopa ae'. Nemaf afamba anis sa'i

* **16:2:** Ap 18:2,18,26

sogahe, esis ina ombal mahas, owa'. ⁴ Sa'i awi ma soga' sotalopa ae' egape namowe. Ea' ina ae' atowe anifela esis bias, owa'atin. Esis Kristen hiasi fowa' sogolalama Godi wapani, sanifelis. *

⁵ Ea' ipa' pise'asa nemaf bu'wafi ma dagala ae'ani esis Kristen isimba safe' sandakolas sagape ipat asaitai. Ea' pi'ipago Epainetus nemaf bu'wafi ae'afi anen alipunai ae'anai endilisi. Anen nali' nahapifa Krai nali'ma epes hiasi itap lu'upa Esia. ⁶ Ipa' penda'makwago nemaf bu'wafi Maria. Ako'w kwanda' maol numa'uni hiani ma kwagatopalopepa.

⁷ Ipa' pese'amo dagala neloma nemaf bu'wafi ae'afi ma amam amamba Andronikus noloma Junias, amom wapani Judaimi si'i ae'. Amom manda' kalabus magaloma ae'i. Amom aposel ma'i amom biam manda' maol bu'wani Godii. Amom mali'ma ae' mahapifa Krai.

⁸ Ipa' pi'ipago Ampliatusa nemaf bu'wafi ma dagala ae'ani. Anen alipunai ae'anai endilisi ma nagape sisihinama Dembinai.

⁹ Pi'ipago Urbanus nemaf bu'wafi ae'afi, anen nanda' maol atitin nagaloma ae'i ma maol Kraisi. Ea' pi'ipago Stakisa nemaf bu'wafi wapani. Anen alipunai ae'anai endilisi. ¹⁰ Ea' pi'ipago Apelesa nemaf bu'wafi ae'afi, anen agol gandawalapana nagaila Krai endilisi. Pi'ipasago dagala ma nemaf bu'wafi ae'afi ma esis sagape ipat atota Aristobulusi. ¹¹ Pi'ipago Herodiona nemaf bu'wafi ae'afi, anen Juda wapani si'i ae'. Pi'ipasago dagala ma nemaf bu'wafi ae'afi esis wambota atota Narsisusi sagahapifa Dembinai. ¹² Pi'ipawago

* **16:4:** 1 Ko 16:15,19; 2 Ti 1:15

nemaf bu'wafi ae'afi ma Trifina kwaloma Trifosa, awo biawa wanda' maol numa'uni Dembinai. Pese'akw nemaf bu'wafi ae'afi ma Persis, ako'w alipu'wi ae'akwi endilisi, kwanda' maol hiani ahifini ma Dembinai. * 13 Pi'ipago Rufusa nemaf bu'wafi anen epen bu'unai naloma ma'mana anani'wi ae' wapani egefala'w ma'mai. 14 Pi'ipasago dagala ae'ani ma nemaf bu'wafi ma Asinkritus, Flegon, Hermes, Patrobas, a Hermas, ea' esis Kristen sahin owan sape sagalomomi.

15 Ipa' pi'ipasago nemaf bu'wafi feloma dagala ae'ani ma Filologus noloma Julia, ea' Nereus noloma haniti'mana anani'wi, ea' Olimpas, soloma esis amam nematawa hiasi Godi sape sagaloma esisi.*

16 Waf afamba apa' amam nematawa Godi, ipa' hipai atona atin pendagala pendaso'asa lagof esis sahin owan hiasi pindanifelis. Amam nematawa Kristen hiasi sagape na'ai sanda'mepago nemaf bu'wafi sandagalamepa.*

Anis epes sanda' esis Kristen sandawal biafis sanda'as awes

17 Alipipai, ae' a'ipipa dindinipa silisolawi andeande' pegapoma anis epes sanda' waf awafii sanda' ipa' Kristen pendawal biafipa sogosambala basef ifimba ipa' pegefa'afi. Waf afambai esis sanda' epes hiasi sowa awes. Ipa' pese'as alafugah epes isimbai. * 18 Esis ina sanda' maola Dembinai ape'inai Kraisi, owa'atin.

* 16:12: Mk 15:21 * 16:15: 1 Ko 16:20; 1 Pi 5:14 * 16:16: Mt 7:15; Ta 3:10 * 16:17: Fl 3:19; Kl 2:4; 2 Pi 2:3

Sagaila ukupa alop asasipi atopi. Sanda' basef atif usiusihifi ma sambaso'ma opalef saga'i'ipa anis epes isimba owa' sogogawa anef waf bu'wafi awafi andeandi'i'a. * ¹⁹ Ipa' paila God, dei' epes hiasi sogawepa ea'. Isimba atis dei' ae' sonahema ipa'. Ae' a'i ipa' pendegawa waf bu'wafi endilisi, apa' ipa' ina ukup pendanda'ma waf awafi, owa'. * ²⁰ God anen kofagonama opaf awanifi, nogota kwaia'uta ma nofa'asa Satan nogafe' lafela bo'wagah ipe'igahi. Ae' ahali' God andabetena Dembinai ape'inai Jisas Krai notopalopepa dowaf nope atapina nogalomepa.*

Anis epes sanda' nemaf bu'wafi sa'ipa esis Rom

²¹ Wandao'oma wanda' maol atini Timoti anen nasapa'ago dagala nemaf bu'wafi ma ipa'. Lusius naloma Jeson a Sosipater, amom Juda wapani si'i ae', amom wapani masapa' nemaf bu'wafi ma ipa'. ²² Ae' Tertius, efa' malogola Pol anda'ago basef ifimba. Ae' asapa' basefa nemaf bu'wafi fafe'mago ipa' ma agol Dembinai ape'inai. * ²³ Gaius nasapa'ago dagala ma nemaf bu'wafi ma ipa'. Anen numafi ae' Pol andeande' ipat ananitai, ea' numafi esis Kristen hiasi wapani safi'i sandakolas na'a'e. Erastus anen nanda' maola gavmani nugumafi otambai taun wambel ambalembai, ea' sahomapa ape'inai Kwartus, amom biam masapa'o basefa dagala bu'wani ma ipa'. ²⁴ [Ae' andabetena Dembinai ape'inai Jisas

* **16:18:** Ro 1:8; Mt 10:16; 1 Ko 14:20 * **16:19:** Ro 15:33; Jen 3:15 * **16:20:** Ap 16:1-2; Ap 19:22, 20:4 * **16:22:** 1 Ko 1:14

Krais notopalopepa dowaf numafipa ma nope nogalomago ipa' hipai. Endilisi.]*

Apa' mondafela agol Godi

²⁵⁻²⁶ Apa' mondasa'ma agol Godi lu'wagol. Anen la'ifinai ma nogowa' banagaip ma basef bu'wafi ananifi agawalapafi, ifimba basef bu'wafi faga'i Jisas Kraisi. Basef ifimba fowa' nimaguf hiafi ata' fape fandambaho', apa' dei' fataga alihifa basef ifimba fowa' amom profet manda'afi afa' wawalapef alihif. God nagape namona atapinai na'i basef dindinipa basef ifimba bu'wafi dei' fataga fandawalap alihifa misi'ah epes hiasi itap anamba hiagoma ma esis hiasi sogahapifana. * ²⁷ Anen atotona nogogawai endilisi. Apa' mondasa'ma agol ananigili dondol lifilafi. Jisas Krais atona natopalopapa mondanda'as na'amba. Endilisi.

* **16:24:** Ef 1:9, 3:5,9; Kl 1:26; Ro 1:5

* **16:25-26:** 1 Ti 1:17; Ju

Basef Bu'wafi Godi
The New Testament in the Mufian Language
Nupela Testamen long tokples Mufian long Niugini
copyright © 1998 Wycliffe Bible Translators, Inc.

Language: Mufian

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

PDF generated using Haiola and XeLaTeX on 11 Nov 2022 from source files dated 9 Oct 2020

9d2b07f2-4ac7-545a-943c-e16df691ef3f